

## Samantakūṭavaṇṇanā

Namo tassa bhagavato arahato sammāsambuddhassa

1. Satatavitata kittiṃ dhastakandappadappaṃ  
Tibhavahitavidhānaṃ sabbalokekaketuṃ,  
Amitamatimanagghaṃ santidaṃ merusāraṃ  
Sugatamahamudāraṃ rūpasāraṃ namāmi;
2. Hataduritatusāraṃ mohapaṅkopatāpaṃ  
Manakamalavikāsaṃ jantunaṃ sesakānaṃ,  
Kumatikumudanāsaṃ buddhapubbācalaggā  
Uditamahamudāraṃ dhammabhānuṃ namāmi;
3. Sakalavimalasīlaṃ dhutapāpārijālaṃ  
Suranaramahanīyaṃ pāhuneyyāhuneyyaṃ,  
Ujupathapaṭipannaṃ puññakhettaṃ janānaṃ  
Gaṇamahamabhivande sāradaṃ sādarena;
4. Iti kaḷita paṇāmā hantva sabbopasagge  
Sugatavimala pādambhojasampāta pūtaṃ,  
Sumanasikharirājaṃ vaṇṇayissaṃ surānaṃ  
Vasati matulametaṃ sādhujantu suṇantu;
5. Savaṇā lapanā ceva satiyā cāpi vandanā,  
Yassa sammā sukhī hotī nibbāṇaṇcādhiyacchati;
6. Tasmā sappurisehe'daṃ patthentehi tisampadaṃ,  
Savaṇīyañhi sādhuhi acikkhittena cetasā;
7. Yo lokatilako nātho pūretvā dasa pāramī,  
Jātosī tusite kāye santusito'ti vissuto;
8. Ārādhito surādīhi kālo mārīsa te ayaṃ,  
Tiṇṇo tārayimaṃ lokaṃ bahū apparajakkhakā;
9. Etadatthāya te vīra pūritā dasa pāramī,  
Bāhuṃ pītussa putto'va loko ālambate tuvaṃ;
10. Tesāṃ taṃ vacanaṃ sutvā mahāsatto mahāmatī,  
Vilokane viloketvā pañcāmala vilocano;
11. Jambudīpaggakamale kaṇṇikā'va manoramā,  
Purī kapiḷavatthū'si visāṇā'va sudhāsināṃ;
12. Singīnikkhamayābhāsa tuṅgasiṅgasamaṅgitā,  
Maṇisīhapañjarākiṇṇa pāsādā yattha bhāsare;
13. Saghane gagane niccaṃ sateratasatāni'va,  
Anileritapajjota soṇṇaketu ahū yaḥiṃ;
14. Janānaṃ nīlanettehi vadanehi tu yā purī,  
Madhupālisamonaddha kañjinī sirimāvahe;
15. Raṅgatuṅgaturāṅgehi gajjitehi ca yā purī,

Saghosuttuṅgakallola lolasāgarasantibhā;

16. Avhamānā'va devānaṃ puralakhyā bhujā iva,  
Mandānileritā tuṅga nānārāgaddhajā yahim;
17. Nānāvesadharā yasmim nānābhūsaṇa bhūsitā,  
Nānāsampattisaṃyuttā nānāvijjāsu pāragā;
18. Navayobbana uddāmā rūpena ca manoharā,  
Saccesu niratā niccaṃ anakuṭṭhakulā siyuṃ;
19. Niccaṃ kīlā vidaddhāhi naranārīhi sevītā,  
Yā purī sādhurūpā'si madhurālāpinīhi ca;
20. Tasmim saddhādayopeta okkākulaketuko,  
Suddhodanavhayo āsī vissuto bhuvanattaye;
21. Yassaṅghikamale sabba bhuhujānaṃ mahītale,  
Kiriṭamaṇiṅgāli kīlanti'va nirantaraṃ;
22. Yassa patthaṭatejena puranetāpi divākaro,  
Vahanīca'mbare līlaṃ osadhīpatino divā;
23. Yassa dānappavāho tu nānāyācaka jantunaṃ,  
Manodadhīsu velantetikkamantova sattataṃ;
24. Matiyā suramantīva dhanena dhanado viya,  
Rūpena kusumesu'va yo jumhati mahītale;
25. Tassābhisittā rajjena mahāmāyāti vissutā,  
Candikā viya candassa girirājā'va kapālito;
26. Lakkhī'va vāsudevassa sītā'va rāmarājino,  
Mahesīsī varārohā sundarī sunderādharā;
27. Tassā kucchikaraṇḍamhi anaggharatanaṃ viya,  
Khattimsāhi nimittehi vimhāpento sadevakam;
28. Sitambujakaro santo sitebhacchāpako viya,  
Katvā padakkhiṇaṃ mātu paṭisandhimagaṇhi so;
29. Dasekādasamāsena tassevaṃ āsi cetanā,  
Passituṃ sakañātīnaṃ gantvāna nagaraṃ tadā;
30. Nivedetvā tamatthaṃ sā rañño tena susajjite,  
Saparicchadā tadā magge gacchanti antarāpathe;
31. Devatānaṃ manonandakara nandana sannibhaṃ,  
Disvāna lumbiniṃ nāma uyyānaṃ mananandaṃ;
32. Tasmim kīlītumussāhā pavisitvāna taṃ vanaṃ,  
Kīlanti upagantvāna maṅgalaṃ sālapādapam;
33. Vilola pallavākiṇṇaṃ suphullakusumonataṃ,  
Gahetvā sālasākhaṃ sā surattakara pallavā;

34. Devehi gahitā'rakkhā mahamāne sadevake,  
Janesi tanayaṃ māyā tatraṭṭhā lokalocanaṃ;
35. Brahmāno lokapālā ca manussā kamato tadā,  
Soṇṇajālājīnādīhi gaṇhiṃsu jananandaṃ;
36. Mahiṃ patiṭṭhito dhīro passitvāna tato disā,  
Uttarābhimukho sattapadaṃ gaṇtvā'mbuje ṭhito;
37. Disantamavaloketvā suphullambujalocano,  
Nīchāresāsabhiṃ vācaṃ aggo seṭṭho'tiādinā;
38. Brahmāmaranarādīhi pūjito ca namassito,  
Kamena abhivaḍḍhanto juṇhapakkhe sasī yathā;
39. Brahmūnaṃ chattachāyāya mandārakusumantare,  
Sānandāmandadevehi dhutacāmaramajjhago;
40. Dibbehi rūpasaddehi gandhehi ca rasehi ca,  
Phoṭṭhabbehi ca dibbehi modamāno anekadhā;
41. Dibbehi ramaṇīyehi nacchehi vāditehi ca,  
Padānekasahashehi thūyamānaguṇākaro;
42. Patvā soḷasamaṃ vassaṃ ñātisaṅghassa majjhago,  
Dassetvā'sesasippaṃ taṃ loke vijjati yaṃ tadā;
43. Ñātisaṅghaṃ pamodento deve ca manuje'pi ca,  
Laddhā yasodharaṃ devīṃ'nukūlaṃ jātijātiyaṃ;
44. Soṇṇadappaṇasaṅkāsa sommānana vibhusitaṃ,  
Nīlanīrajasāṅkāsa visālāyata locanaṃ;
45. Siṅgāramandiradvāre dhajopamabhamudvayaṃ,  
Hemakāhalasaṅkāsa nāsikaṃ rūpalakkhiyā
46. Nīlavellitadhammilla jimutobhaya koṭiyaṃ,  
Niccavijjullatācakka manuññakaṇṇapāsakaṃ;
47. Sātakumbhanihbābhāsa payodharaghaṭadvaṃ,  
Suvaṇṇadditaṭāyāta nijjharākārahāraṃ
48. Dehadevaddumālamba pārohābhabhujadvayaṃ,  
Aṅgulīpallavantambu binducāru nakhāvaliṃ;
49. Dehamālālimālābha romarājivirājitaṃ,  
Rūpaṇṇavataṅgāha valittaya vicittakaṃ;
50. Soṇṇarambhāsamāvaṭṭa piṇorudvaya sundaraṃ,  
Sannirakalikākāra cārujaṅghā vibhūsitāṃ;
51. Paccakkharūpalakkhiṇca līlānicaya sannibhaṃ,  
Guṇānamākaraṃ sādhu velaṃva ratisāgare;
52. Kanto vasantarājā'va kandappo'va surūpavā,  
Sasī'va dassanīyo ca sūriyo viya tejavā;

53. Acalattena merūva gambhīrenaṇṇavo viya,  
Brahmassaro piyaṃvādī paṅgñāya ca anūpamo;
54. Vasanto so mahāvīro purasmim kapilavhaye,  
Disvā nimitte caturo uyyāna gamanañjase;
55. Pabbajjābhirato nātho gantvā uyyānabhūmiyaṃ,  
Suphullacampakāsoka nāgādā'gehi maṇḍitaṃ;
56. Phullapaṅkaja kaḷhāra jalājalaya satākulaṃ,  
Mandamandānilāyāta nānāmodehi vāsitaṃ;
57. Sarā saraṃ samāyāta madhubbata nisevitaṃ,  
Phalapuppharasuddāma dvija saṅgha nikūjitaṃ;
58. Naccanta mattamorānaṃ niccaṃ maṇḍapasantibhaṃ,  
Dibbanta migasagghānaṃ kīlāmaṇḍapa sannibhaṃ;
59. Samīra sisirodāra dhārāsīkara vārihi,  
Dhārāmaṇḍapa pantūhi janānandakaraṃ varam;
60. Uyyānavanamāgamma devarājāva nandanam,  
Kīlānto nijaputtassa sutvāna jātasāsanam;
61. Nivatto vissakammena sahasakkhova bhūsito,  
Puraṃ pavisaṃānova kisā gotami bhāsitaṃ;
62. Sutvāna nibbutapadaṃ tadā cittānukūlakaṃ,  
Santuṭṭho sānurāgo ca lakkhagghaṃ tārabhāsuraṃ;
63. Hāraṃ tissāya pesetvā gantvāna sakamandiraṃ,  
Devarājāvilāsena nisīdi pavarāsane;
64. Athāgamma tadā nekanāṭīkā parivārayaṃ,  
Vajjanti bheriyo tāsū paggayha kāci nāriyo;
65. Nānālayasamākiṇṇaṃ gītaṃ gāyanti kāci'pi,  
Dhamanti susiraṃ kāci kāci vādenti tantiyo;
66. Cāru bimbādhārāramma payodharabharā subhā,  
Visālāyata nīlakkhā somasommānanā tadā;
67. Naccanti purato tassa bherimaṇḍala majjhagā,  
Devakaññāva raṅgamhī rasabhāvanirantaraṃ;
68. Disvāna so tamacchariyaṃ viratto visaye tadā,  
Urattāḷaṅca addakkhi sabbantaṃ bheritāḷanaṃ;
69. Paridevaṃ'cupaṭṭhāsi gītaṃ saṃsārasāgare,  
Vāyuvega vikāraṃ'va naccaṃ cintesi nāyako;
70. 'Kadāhaṃ gharamossajja pabbajjāsiri mubbahe?'  
Icevaṃ cintayanto so supantova sayī tahiṃ;
71. 'Yaṃ nissāya mayaṃ ettha naccagītesu vyāvaṭā,  
So'yaṃ'dāni supī' amhe kassadāni karoma taṃ?;

72. Iti cintiya te tattha turiyesu sake sake,  
Ālambā sayitā kaññā susaṅṅāṅṅamanissitā;
73. Khādanti kāci dantāni kāci lālā vahantiyo,  
Kāci rudantiyo tattha vilapanti athā'parā;
74. Kākacchanti'pi semhampi gilanti ca camanti ca,  
Karonti nādaṃ nāsāya gharū'ti ca khipanti ca;
75. Muttayanti tadā kāci rahassaṃ vicaranti ca,  
Duggandhaṃ vāti taṃ ṭhānaṃ susānaṃ āmakaṃ yathā;
76. Pabuddho aḍḍharattamhi gate tattha nisīdiya,  
Addakkhi tāsāṃ nekāni vikārāni tahiṃ tadā;
77. Tassevaṃ pekkhamānassa bhava saṃviggacetaso,  
Ādittaṃva upaṭṭhāsi mane khalu bhavattayaṃ;
78. Dāvānala samāditta mahāraññāyathā gajo,  
Tathevāsi narindassa gehato gamane matī;
79. Tato vuṭṭhāya sayanā karonto abhinikkhamaṃ,  
Vitakkesi mahārājā passituṃ sakamatrajaṃ;
80. Pavisitvā tato gabbhaṃ sanikaṃ santamānaso,  
Passitvā saha puttena niddāyantīṃ yasodharaṃ;
81. Cirāgataṃ mahāpemaṃ dhārayaṃ sakamānase,  
Buddho hutvāpi'maṃ sakkā passituṃ iti cintiya;
82. Gato nātho tato ṭhānā bodhiyā baddhamānaso  
Tadahevāsi buddhoti kāmuko ko na cintaye;
83. Sineru muddharantova pādudhdhariya nikkhamaṃ,  
Channamāhūya ānītaṃ kanthakaṃ turagādhipaṃ;
84. Assarājaṃ tamāruya saha channena rattiyaṃ,  
Devehi vivaṭadvarā paṭipajji mahāpathaṃ;
85. Cakkavāḷesu nekesu devatā susamāgatā,  
Dīpadhūpaddhajehe ca gandhamālehi pūjayuṃ;
86. Purato saṭṭhīsaḥassāni daṇḍadīpāni dhārayuṃ,  
Tathā dakkhiṇapassamhi vāmapasse ca pacchato;
87. Gaganā pupphavassāni vassāpesuṃ cha devatā,  
Mandāraṃ kokanadaṃ sugandhaṃ cittapāṭa liṃ;
88. Campakā soka punnāga nāgapūgāga sambhavaṃ,  
Mālatīvassikīyādī nānavallīhi sambhavaṃ;
89. Padumuppala kalahāra kumudādyāmbu sambhavaṃ,  
Sugandhamadhu mattāhi chappadālīhi kūjitaṃ;
90. Pupphavassaṃ pavassittha tiṃsayojanamañjase,  
Pasatto tattha turago dukkhato agamī tadā;

91. Evaṃ pūjāvidhānehi gantvā' nomañ mahānadim,  
Sitasekata saṅkiṇṇañ bahumīnakulākulaṃ;
92. Tiraṅṅho passi so dhīro gaṅgānāriṃ rasāvahaṃ,  
Karontiṃ vīcibābhāti eṇepupphopahāraṃ;
93. Assena taṃ mahānomaṃ laṅghāpetvā mahāmatī,  
Paratīre patitṭhāsi vimale vālukā tale;
94. Pabbajituṃ mayettheva yuttaṃ no me papañcituṃ,  
Iti cintiya obhāya dhāritābharaṇāni so;
95. Channassa paṭiyādetvā kanthakañca hayādhipaṃ,  
Nisitaṃ khaggamuggayha samoliṃ chindi kuntalaṃ;
96. Evamāvajjayaṃ nātho sace'haṃ sugato bhava,  
Tiṭṭhatu gagane gantvā iti ukkhipi ca'mbaram;
97. Tato sakko mahagghena maṇicaṅgoṭakena taṃ,  
Paṭiggahetvā sirasaṃ netvā devapuraṃ caraṃ;
98. Kāretvā maṇithūpaṃ so nīdhetvā taṃ siroruhaṃ,  
Atthāhaṃ patimāneti sahadevehi nekadhā;
99. Mahābrahmopanītaṭṭhaparikkhāraṃ mahāmatī,  
Paṭiggahetvā kāsāvaṃ nivattho pāruto tadā;
100. Pubbe viyambaraṃ gayha ambare khipi nāyako,  
Paṭiggahetvā taṃ brahmā netvā brahmapuraṃ caraṃ;
101. Dvādasayojanubbedhaṃ katvā thūpavaraṃ subhaṃ,  
Tattha taṃ nidahitvāna paṇipātetī sabbadā;
102. Sampuṇṇa manasaṅkappo pabbajjāsiri mubbahaṃ,  
Chādentō kāmāleneva maruṃ caṅakkami nāyako;
103. Tato ambavanaṃ gantvā vindanto pītijaṃ sukhaṃ,  
Vītināmayi sattāhaṃ ramme pādapamaṇḍape;
104. Tato rājagahaṃ gantvā pārupitvā cīvaram,  
Gahetvā maṇivaṇṇaṃ so pattaṃ karatalambujā;
105. Battimsa lakkhaṇūpeto anubyañjana maṇḍito,  
Brahmujjuggatto bhagavā purasetṭhamupāgami;
106. Visikhantarena gacchantañ lokekanayanaṃ janā,  
Disvā evañ vicintesuṃ nāyaṃ yo so janādhipo;
107. Kāmaṃ puravadhusomma vattasambandhakāraṇā,  
Cando'yamāgato ajja sakavesena no mati;
108. Sutvāna taṃ tadā keci hasantā vacanantaraṃ,  
Nāyaṃ sasī sasaṅkē so bhānumeso'ti no mati;
109. Bodhetumāgato kāmaṃ porīnaṃ vadanambuje,  
Sakīyeneva rūpena vimhayaṃ porimānuse;

110. Kiṃ bho ummattakā attha evaṃ mā vadathā'dhunā,  
Sataraṃsī uṇharaṃsī na so eso aviggaho;
111. Kāmenālasajantuhi kīḷituṃ puramāgato,  
Sarūpena na no atthi saṃsayo balu mānase;
112. Tesam taṃ vacanaṃ sutvā hasantā keci jantuno,  
Tumhe khalū na jānātha sabāṇe sadhanū hi so;
113. Issaro kantarūpena tuṅgamandiratā puram,  
Kelāso itī sampatto jahātha vimatiṃ idha;
114. Tesampi vacanaṃ sutvā hasanteke janā tadā,  
Nāyaṃ haro tinetto so kesaveso idhāgato;
115. Viciṇanto sirim aḷḷa puraseṭṭhamupāgataṃ,  
Vesenaññaena maññaṃ ettha no natthi saṃsayo;
116. Paharivā karaṃ keci sutvā taṃ vacanaṃ narā,  
Hasantevaṃ tadāvocum vāsudevo na ve ayam;
117. Kāmaṃ sarojanābho so vāmano kaṇhaviggaho,  
Ayamaññataracaṇṇena āgato pākāsāso;
118. Puram devapurantetaṃ maññaṃ mahājutim,  
Passitunti paṭiññaṃ mā bhonto vilapantu ve;
119. Sutvā tesam giram keci keḷim katvāna nekadhā,  
Tumhe sakkam na jānātha so hi bho vajirāyudho;
120. Eso hi bho mahābrahmā brahmalokā idhāgato,  
Pamattā kinnu vedamhī brahmabandhu pure idha;
121. Athesaṃ vacanaṃ sutvā keci paṇḍitajātikā,  
Nete candādayo kāmaṃ mā moham bho pakāsatha;
122. Caturānāno mahābrahmā somasommānāno ayam,  
Samantapotthako brahmā pattahatto'yamabbhuto;
123. Kāmaṃ pāramitāpuṇṇa pasattho puriso ayam,  
Niccaṃ vandatha pūjetha thomethetaṃ mahājutim;
124. Evaṃ vadantā sabbe te nāgarā purisuttamaṃ,  
Gandhapupphēhi puḷentā namassantā tamanvagum;
125. Nettārittehi pājentā munino rūpasāgare,  
Jantavo mananāvāyo pāram passimsu no tadā;
126. Tadā lokekanayano sapadānena vīthiyam,  
Caram yāpanamattaṃva laddhāgamma purā bahi;
127. Paṇḍavam girimāsajja tassacchāyāya so muni;  
Saṅghāṭim paññāpetvāna nisajja purisāsabho;
128. Adiṭṭhapubbaṃ disvāna patte missakabhojanaṃ,  
Saṅgāṭapaṭikūlo taṃ nudivā paccavekkhaṇā;

129. Amataṃ viya taṃ bhutvā vikkhāletvā mukhaṃ dakā,  
Patte vattaṃ caritvāna muhuttaṃ tattha vissami;
130. Pavattiṃ taṃ nisāmetvā bimbisāro narissaro,  
Sīghaṃ tamupagantvāna katānuñño nisīdiya;
131. Nimantayitvā rajjena anicchante yatissare,  
Anuggahāya me yuttaṃ buddhabhūtenidhāgamam;
132. Evaṃ nimantito tenādhivāsetvā mahāmaṭī,  
Agamāsuruvelāya matuloru parakkamo;
133. Padhānaṃ padahitvāna chabbassamatidukkaraṃ,  
Pakāsetvāna lokassa mokkhaṃ natthiti tena so;
134. Tatoppabhuti vattanto majjhimappaṭi pattiyaṃ,  
Kāyassānuggahaṃ katvā tato sampiṇṇi'ndriyo;
135. Mūle'japālanigrodhapādapassa mahāmuni,  
Nisīdi nijasobhāhi obhāsento disodisaṃ;
136. Tadā senāni nigame sujātā khīra dāyikā,  
Sampunṇamanasaṅkappā yācitvā vaṭadevatam;
137. Dhīraṃ devoti maññanti tuṭṭhahaṭṭhā pamoditā,  
Hemapātiṃ sapāyāsaṃ datvāna idama'bruvi;
138. Yathā mayhaṃ mahādeva iddhā patthita patthanā,  
Tatheva tava saṅkappo khippameva samijjhatu;
139. Iti vatvāna vanditvā katvā ca naṃ padakkhiṇaṃ,  
Pakkantāya sujātāya dhīro pātiṃ samādiya;
140. Upagantvānātirammaṃ nadiṃ so nīlavāhiniṃ,  
Suppatiṭṭhitanāmamhi nadītitthe nisīdiya;
141. Bhuñjitvā ūnapaṇṇāsa piṇḍaṃ katvāna bhojanaṃ,  
Vissajjetvā tato pātiṃ paṭisotaṃ narāsabho;
142. Tato sālavanuyyāne vissamanto divādine,  
Disvāna supine pañca atthaṃ tesam vicintiya;
143. Ābodhimūlato magge devehi samalaṅkate,  
Maṇitorañapālīhi puṇṇakumbhaddhājādihi;
144. Sāyaṇhasamaye nātho gacchanto bodhi santikaṃ,  
Disvāna sotthiyaṃ nāma thūyamānaṃ dijuttamaṃ;
145. Tena dinnaṭṭha muṭṭhintu gahetvā nīlasaddalaṃ,  
Bodhimūlamupāgamaṃ katvāna taṃ padakkhiṇaṃ;
146. Akāsi tīṇasanthāraṃ pācīnābhimukhaṃ tadā,  
Tato mahiṃ dvidhā katvā samuṭṭhāsi mahāsaṃ;
147. Uccaṃ cuddasahatthena nānā citta vicittitaṃ,  
Abhaṭṭhanahittha tatraṭṭho iccevaṃ daḷhamānaso;



148. Kāmaṃ taco nahārū ca aṭṭhi ca avasissatu,  
Upasussatu me gatte sabbantaṃ maṃsalohitaṃ;
149. Na utṭhahāmaḃujjhivā na jahe vīriyaṃ mama,  
Adhiṭṭhahitvā evaṃ so nisīdi vajirāsane;
150. Anatikkamaṃ ṭhapetvāna caraṇaṃ caraṇupari,  
Kamalaṃ kamaleneva maṇibandhaṃ vidhāya so;
151. Bālāsokadalāsatta paraṃ vā'sokapallavaṃ,  
Nidhāya nayanānataḃ pāṇiṃ pāṇitale jino;
152. Yathā sañjhāghanaḃlīḃha tuṅgakañcana pabbato,  
Surattacīvaracchanna cārigatta virājito;
153. Udayāvalakoṭimhi dīppantova divākaro  
Kandharopari dīppanta mukhamaṇḃalamaṇḃito;
154. Yathā cāmikarabyamhe sunīlaṃ sīhapañjaraṃ,  
Asampakampapamhehi pihitaddhasulocano;
155. Nīluppalakalāpaṃca jananettālipātanaṃ,  
Sajjhudaṇḃasamaḃbaddha bodhikkhandhamaphassi so;
156. Nisinno bodhito chejja pavāḃataruṇaṅkurā,  
Patamānā samantāsuṃ tejaṃ viya kubuddhīnaṃ;
157. Devā tattha samāgañjuṃ khippaṃ dasasahassiyaṃ,  
Kamalāsanoragā ceva siddhavijjādharādayo
158. Sahampati mahābrahmā brahmasenāpurakkhato,  
Sītātapattaṃ dhārento ṭhīto sambuddha santike;
159. Vīsaṃ ratana satāyāmaṃ vijayuttara nāmakam,  
Saṅkhaṃ dhamento aṭṭhāsi sādaro pākasāsano;
160. Suyāmo saha senāya thomayanto narādhipaṃ,  
Maṇitālavaṇṭaṃ paggayha mandamandena vījati;
161. Jitakitti lataggamhi sassa pupphaṃca pupphītaṃ,  
Vāḃavijanimuggayha aṭṭhā santusito tahiṃ;
162. Beluvaṃ vīṇamādāya gītaṃ nānālayānugaṃ,  
Pañcasikho ṭhito tattha gāyamāno anekadhā;
163. Mahākālo'pi nāgindo nāgasaṅghapurakkhato,  
Thomento tattha aṭṭhāsi navārahaguṇādihi;
164. Raṅgabhumīṃ māpayitvā gahetvāna varaṅganā,  
Upahāraṃ karontaṭṭhā timbarū sūriyavaccasā;
165. Āgantvā saha senāya sitaṅgo sitabhusano,  
Dhataratṭho ṭhito pubbe ārakkhaṃ kurumānako;
166. Pūrento sakasenāya dakkhiṇassaṃ virūḃhako,  
Ārakkhaṃ kurumānaṭṭhā nīlaṅgo nīlabhusano;

167. Virūpakkho'pi atthāsi pālayaṃ pacchimaṃ disaṃ,  
Rattaṅgābharaṇo vammī nijasenāpurakkhato;
168. Uttarassaṃ sasenāya ārakkhaṃ kurumānako,  
Soṇṇavaṇṇaṅgābharaṇo atthāsi naravāhano;
169. Kimettha bahulāpena jātikkhettamhi devatā,  
Nāgatā neva vāhesuṃ sabbe etthe'va osaṭā;
170. Gaganātotiṇṇaketu pādehi pathavītale,  
Nāgādayo na dhutāsūṃ ketunaṃ bahu kā kathā;
171. Na dhūtā dhajapādehi vāyutuddāmaṃvuttihi,  
Tārakā gagane brūmo kinna tatha dhajālūtā;
172. Pubbadisā cakkavāḷa silāyuggataketunaṃ,  
Pādāni parabhāgādi cakkavāḷasilanvaguṃ;
173. Cakkavāḷa mahāmeru yugandhara nagādayo,  
Pupphāvataṃsakā'vāsūṃ nānāvaṇṇehi saṅkhatā;
174. Vāmāmandamakaranda bindusandoha sundaraṃ,  
Ullola padumākiṇṇa vitānaṃ vāsi ambaraṃ;
175. Khittasogandhacuṇṇāni devabrahmādinā tahiṃ,  
Vitānaṃ viya khāyanti cakkavāḷaggamaṇḍape;
176. Kappūrāgarudhūpehī tatha tatthuggatehi mā,  
Kālabbhakūṭacchannova āsi maññaṃ kathamū kiṃ;
177. Jātikkhettesu devehi katagghikusumādinā,  
Nosīnā dharaṇī bhārā disebhānaṃ balaṃ aho;
178. Ambarālamamānānī pupphadāmāni bhūtalaṃ,  
Ākaḍḍhanāya devehi baddharajjuva bhāsare
179. Aññoññaṅkaramuggayha gagane surasutdarī,  
Paribbhamantā gāyanti tatha tatha manoramaṃ;
180. Ubho bhuje vikāsetvā maṇḍitaṃ surasutdarī,  
Bhamanti bhantabheṇḍuva tatha tatthambare yugā;
181. Nīluppalakalāpādī gahetvāna suraṅganā,  
Ṭhītāsūṃ parivāretvā pūjamānā narissaraṃ;
182. Ratnapallavakalahāra kamaluppala saṅgate,  
Sannīrakusumākiṇṇe puṇṇesogandhavārihī;
183. Kañcanādighaṭe gayha ambare surasundarī,  
Katvāna sugataṃ majjhe pūjayiṃsu samantato
184. Kañcanādāsahatthā ca kācī kaññā tathā ṭhitā,  
Tālavaṇṭe gahetvāna ṭhītāsūṃ kācī devatā;
185. Kācī maṅgala saṃyutta vacanā tava patthanā,  
Samijjhatutī ghosentī parivāretvā ṭhitā jinaṃ;

186. Sirivacchādi paggayha aṭṭhamaṅgalamuttamaṃ,  
Thitāsuraṃ gagane nārī parivāretvā munissaraṃ;
187. Naccanti keci kīḷanti selenti ca lalanti ca,  
Vādenti keci gāyanti velukkhepaṃ karonti ca;
188. Nekapupphagghipantī ca tathā dīpagghipanti ca,  
Maṇicāmīkarāsajjhu agghikā pantiyo tathā;
189. Ābrahmabhavanuggamma cakkavāḷasamantato,  
Tiṭṭhanti jalamānāyo buddhassa maṅgalussave;
190. Sattaratanasambhutā nānā toraṇapantīyo,  
Hemarambhāmayā cāpi tathā dussamayā siyuraṃ;
191. Nānāvaṇṇehi nekehi chattehi ca nirantaraṃ,  
Cakkavāḷodaraṃ āsi saraṃca kamalākulaṃ;
192. Tattha tatthujjalāneka yantadīpāvalī mahī,  
Tārakājālakākīṇṇa gaganāṅgasantibhā;
193. Dhajantarita chattā'suraṃ cakkavāḷagirūpari,  
Nirantarā'suraṃ tattheva ghaṭadīpā ca toraṇa;
194. Nānāhuriyanādehi nānāsaṅgītītāhi ca,  
Sādhuvādehi nekehi cakkavāḷo phuraṃ ahū;
195. Aho mahantatā tassa buddhassa katamaṅgale,  
Pūjāvīsesaṃ taṃ ko hi mukhenekena bhāsati;
196. Catummukho sahasakkho dvisahassanayano phaṇī,  
Dasakaṇṭho'pi taṃ sabbaṃ neva sakkonti bhāsitaṃ;
197. Evaṃ surāsurabrahma venateyyoragādīhi,  
Nirantaraṃ katāneka mahāmaha samākule;
198. Tasmintu vāsare māro passitvā bhuvanaṃ idaṃ,  
Āmantevā sānuvare āhevaṃ sakutūhalo;
199. Sabbe dibbavimānā bho suññā dissanti chaḍḍitā,  
Purapālampaḥpetvā kva gatā'suraṃ sadevakā;
200. Kimbho māra na jānāsi matto sutto'si ajja kiṃ,  
Suddhodaniya siddhattho māyāya tanayo ayaṃ;
201. Puretvā pāramī sabbā katvāna abhinikkhamaṃ,  
Bodhimule nisinna si ajja buddho bhavāmīti;
202. Tassa pūjāvīdhānatthaṃ dasasahasīsū devatā,  
Samāgatā haṭṭhatuṭṭhā karontajja mahāmahaṃ;
203. Kinna te badhiraṃ sotaṃ kinna parihāyi locanaṃ,  
Dhajaggā te na dissanti ullolaṃ te na sūyati;
204. Tesāṃ taṃ vacanaṃ sutvā antako khalu pāpimā,  
Dukkhito dummano tesāṃ socanto idambuvi;

205. Aho vatā'tiparihāni saṃsārassa mahā ayaṃ,  
Asāro khalu saṃsāro siddhatthe vibhavaṃ gate;
206. Aho vatā'ti naṭṭhamhā tivaṭṭaṃ paripuritaṃ,  
Hoti bho dahanā daḍḍhavanaṃvāti alakkhikaṃ;
207. Nirālokaṃ tilokaṃ bho asuraṃ vāsaraṃ yathā,  
Parimosaratanāṃ hoti rajjaṃ vedaṃ jagattayaṃ;
208. Mamesa visayaṃ hitvā yāti siddhatthadārako,  
Tena yātena maggena nikkhamanti bahujjanā;
209. Bhavantaṃ na karoteso yāva suddhodanatrajo,  
Etha gacchāma siddhatthamasiddhatthaṃ karoma bho;
210. Māpetha bheravaṃ vaṇṇaṃ bībhacchaṃ duddasaṃ kharaṃ,  
Saddeneva palāpetha tūlabhaṭṭaṃva vāyunā;
211. Tassa taṃ vacanaṃ sutvā mārasenā samāgamuṃ,  
Nānāvesadharā hutvā nānāyudha samaṅgino;
212. Yojanānaṃ tadā māro diyaḍḍhasatamuccato,  
Girimekhalamāruyha senāya sahasā'gamī;
213. Disvāna durato ettaṃ devā māraṃ savāhiniṃ,  
Bhayaṭṭāpagaṃuṃ khippaṃ dhāvamaṇā disodisaṃ;
214. Saṃkhippa khippaṃ sacchattaṃ brahmā dhāvi parammukho,  
Katvāna piṭṭhiyaṃ saṅkhaṃ sakko dhāvi visaṅkito;
215. Mahākālo'pi nāgindo nimujja mahiyaṃ tadā,  
Vattadattakaro bhīru sake nīpati mañcake;
216. Saṃ saṃ pūjāvidhānantu chaḍḍetvāna sadevakā,  
Gatāsuṃ suññakaṃ āsi cakkavālamidaṃ tadā;
217. Nissirīkaṃ padesaṃ taṃ asobhaṃ asamañjasāṃ,  
Aho si patitāneka pūjābhaṇḍasamākulaṃ;
218. Ekova tattha sugato nisīdi vajirāsane,  
Pajjalaṃ nijasiriya sūriyova yugandhare;
219. Akampo ca asantrāsī lomahaṃsa vivajjito,  
Abhīto sīharājāva migacchāpānamaggato;
220. Tato dhammissarassagge dunnimittāni jāyaruṃ,  
Andhakāraṃ disā āsuṃ dhūmaketu ca ambare;
221. Dināṃ duddinakaṃ āsi hataraṃsi divākaro,  
Ukkāpato'pi paññāyi disāḍḍāhopapajjatha;
222. Aghane gagane āsuṃ indacāpavirajjutī,  
Analāsaniyo'dittā tattha tattha patantī ca
223. Kākolasaṅghā vassimsu uṇṇa sakuṇakosiyā,  
Carimsu ambare'petā kabandhā ca bhayāvahā;

224. Senaṃ saṃvidahitvāna tato māro abhiddavi,  
Āgantvā cakkavāḷamhi ʘhito jinamudikkhiya;
225. Ekakassa manussassa santikopagamaṃ mama,  
Na yuttañhi gajo yāti gajaṃ no yāti kothhukaṃ;
226. Netam garu palāpetuṃ kālo iti vicintiya,  
Māpesi kupito khippaṃ kappanila samānilaṃ;
227. Khipanto gagane khippaṃ uddharitvā vanaspatī,  
Katvāna vanamummūlaṃ viddhaṃsento asesakaṃ;
228. Cāletvā tālasālādiṃ luñcitvā gagane khipaṃ,  
Pātentō cakkavāḷante vājisīha gajādayo;
229. Paharitvā vivattetvā girikūṭāni ukkhipaṃ,  
Bhamayanto nabhomajjhe dhāvateva tato tato;
230. Silāhi silāsaṅghaṭṭa mahānādaṃ pavattayaṃ,  
Pātentō dahanañcāpi dhūmamambara mukkipaṃ;
231. Bhamayanto gahetvāna ambare chadaniṭṭhikā,  
Pāsāde parivattetvā paharanto nagādisu;
232. Khananto pathaviṃ paṃsuṃ gahetvāmbaramaṇḍale,  
Bandhantova paraṃ bhumiṃ bhindanto tuṅgapabbate;
233. Bhayānakena saddena upagamma mahāmuniṃ,  
Cāletuṃ neva so sakkhi aṃsumattampi cīvare;
234. Tadāsi vijayo tassa sambuddhassa sirīmato,  
Paṭhame mārayuddhamhi māressāsi parājayo;
235. Evaṃ mahānubhāvoti mantvāna naraśārathiṃ,  
Niccaṃ vandatha pūjetha so hi vo saraṇaṃ sadā;

Iti paṭhamo vijayo.

236. Disvā namuci dhīrassa mālutenānupaddavaṃ,  
Dukkhi ca dummano āsi kodhenāturamānaso;
237. Hotu dāni mahoghena pavāhemi imaṃ yatim,  
Māpetvāna mahāmeghaṃ socanāya alaṃ mama;
238. Iti cintiya so māro mahāmeghamamāpayi,  
Disāsumpihitā sabbā andhakāro avatthari;
239. Uparūpari guṇā hutvā sahasāni satāni'pi,  
Dhārādharā mahādhārā vattayiṃsu samantato;
240. Sodāminīsaḥassehi vinaddhaṃva nabhaṃ ahū,  
Tattha tattha disābhāge indacāpā avattatha;
241. Mahārajatarajjūhi sibbitāva nabhāvanī,  
Dharādharorudhārāhi nirantarapavattihi;

242. Tattha tattha patantāni ghorāsanisatā ahuṃ,  
Mahābhīma nabho bherissanā āsuṃ tahiṃ tahiṃ;
243. Uddharanto mahāsele mahogho ca tadubbhave,  
Kelāsa sikharākāra eṇepuñje samubbahaṃ;
244. Mahāthūpappamāṇādi mahābubbulamubbahaṃ,  
Gambhīro puthulo caṇḍo upagamma jinantikam;
245. Sarīre lomamattampi temetumasamatthako,  
Gato mahogho buddhassa' bho' nubhāvamahantatā;
246. Tadāsi vijayo tassa sambuddhassa sirīmato,  
Dutiye mārayuddhamhi māressāsī parājayo;
247. Evaṃ mahānubhāvoti mantvāna nara sārathim,  
Niccaṃ vandatha pūjetha so hi vo saraṇaṃ sadā;

Dutiyo vijayo.

248. Tato māro asakkonto vassoghena upaddavaṃ,  
Kātuṃ tassa usūyādi kopākulamano tadā;
249. Bhavatajja kimetena māraṇe tassa kiṃ garu,  
Idānaṅgāravuṭṭhīhi jhāpemi sahasā imaṃ;
250. Iti cintiya so māro māpetvāṅgāra vuṭṭhiyo,  
Pesesi nabhasā tassa sambuddhassa upantikam;
251. Mahāpabbatasānkāsa jalitaṅgāra rāsayo,  
Dhāvimsu nahasā tattha accimanto mahabbhayā;
252. Cicciṭāyana saddehi pūrayanto disantaraṃ,  
Dhūpāyanto phuliṅgehi māressāpi bhayāvahā;
253. Ujjālentā mahārukkhe pabbate' pi ca sammukhe,  
Narakodaruggatā aggī rāsīvāti bhayāvahā;
254. Upagantvā muhuttana nisinnaṃ munipuṅgavaṃ,  
Madhumattālijhaṅkāra nādākuladisāmukhā;
255. Pāteṇti satatāmanda makarandaja bindavo,  
Mālāvataṃsakā hutvā pādamule patiṃsu tā;
256. Tadāsi vijayo tassa sambuddhassa sirīmato,  
Tatiye māra yuddhamhi māressāsī parājayo;
257. Evaṃ mahānubhāvoti mantvāna nara sārathim,  
Niccaṃ vandatha pūjetha so hi vo saraṇaṃ sadā;

Tatiyo vijayo.

258. Tenānupaddutaṃ buddhaṃ passitvāna pajāpati,  
Dukkhitō dummano hutvā evaṃ cintesi dummati;

259. Pāsānavassam māpetvā cuṇṇetvā panimam yatiṃ,  
Viddhamsemīti cintetvā māpesūpalavassakam;
260. Tasmim vasse'ti bībhacchā dhūmāyantā sajotikā,  
Jalitaṅgārasaṅkāśā pāsāṇuccāvaca bahū;
261. Karānaññoñṇasaṅghaṭṭā mahantaṃ bheravaṃ ravaṃ,  
Duddinaṃ dhūmajālāhi kurumānā samantato;
262. Satthūpagantvābhimukhaṃ santamālāgulā viya,  
Paṭimsu siripāde te amandāmodavāhino;
263. Tadāsi vijayo tassa sambuddhassa sirīmato,  
Catutthe mārayuddhamhi māressāsi parājayo;
264. Evaṃ mahānubhāvoti mantvāna naraśārathiṃ,  
Niccaṃ vandatha pūjetha so hi vo saraṇaṃ sadā;

Catuttho vijayo.

265. Disvānattamano māro ditto kodhagginā tadā,  
Māpetvā'yudhavassam so pesesi tadupantikaṃ;
266. Netṭimsacchūrikā satti heṇḍivāla gadādayo,  
Tiṅgadhārā pajjalitā acirajjuti sannibhā;
267. Yathā pupphopahāropagantvāna gaganāṅganā,  
Evaṃ sambuddhapādesu paṭimsu parivattitā;
268. Tadāsi vijayo tassa sambuddhassa sirīmato,  
Pañcame mārayuddhamhi māressāsi parājayo;
269. Evaṃ mahānubhāvoti mantvāna naraśārathiṃ,  
Niccaṃ vandatha pūjetha so hi vo saraṇaṃ sadā;

Pañcama vijayo.

270. Taṃ disvā pāpimā kuddho yaṃ yaṃ tassa karoma'haṃ,  
Taṃ taṃ'dānī na sakkoti kiñci kākumu'pakkamaṃ;
271. Māpesi kukkulaṃ vassaṃ māramīta'dhunā munim,  
So'gā'kāśā sampaditto dhūmāyantova pajjalaṃ;
272. Jinassābhimukhaṃ gantvā kukkulo parivattiya,  
Candanassa sitabbhassa dhūlī hutvāna pagghari;
273. Tadāsi vijayo tassa sambuddhassa sirīmato,  
Chaṭṭhe namuci yuddhamhi māressāsī parājayo;
274. Evaṃ mahānubhāvoti mantvāna naraśārathiṃ,  
Niccaṃ vandatha pūjetha so hi vo saraṇaṃ sadā;

Chaṭṭho vijayo.

275. Tato disvāna taṃ kaṇho kaṇhasenā purakkhato,

Saṅkuddho pesayi tattha vassaṃ so sikaṭāmayam;

276. Khadīraṅgāra saṅkāsa vālukā gaganāgatā,  
Bhassantā jinapādante vāsacuṇṇattamāgatā;
277. Tadāsi vijayo tassa sambuddhassa sirīmato,  
Sattame mārayuddhamhi māressāsi parājayo;
278. Evaṃ mahānubhāvoti mantvāna nara sārathim,  
Niccaṃ vandatha pūjetha so hi vo saraṇaṃ sadā;

Sattamo vijayo.

279. Tampi disvā asajjanto ahirī kopaketuko,  
Māpetvā palipandāni tattha osīdayāmi taṃ;
280. Iti cintiya māpetvā pesesi palipaṃ ghaṇaṃ,  
Dhūpāyanto pajjalanto gantvā so nabhasā lahuṃ;
281. Sambuddhasiripādamhi sampatto nibbuto tato,  
Nānāsugandhasambhuta gandhakaddamataṃ gato;
282. Tadāsi vijayo tassa sambuddhassa sirīmato,  
Aṭṭhame mārayuddhamhi māressāsi parājayo;
283. Evaṃ mahānubhāvoti mantvāna nara sārathim,  
Niccaṃ vandatha pūjetha so hi vo saraṇaṃ sadā;
284. Olokento tato māro mārārim siriuyjalam,  
Disvā cittampasādetumasakkonto'ti kopavā;
285. Ajjetamandhakārasmiṃ pakkhipitvā pamohitaṃ,  
Mayhaṃ bhāroti cintetvā māpesi timiraṃ ghaṇaṃ;
286. Lokantaresu sambhuta timiso'va bhayāvaho,  
Gantvāna gaganā so hi patvāna munisantikaṃ;
287. Yathā timiramāyāti vināsaṃ suriyuggate,  
Evamāsi jinaggamhi andhakāro tathāvidho;
288. Tadāsi vijayo tassa sambuddhassa sirīmato,  
Navame mārayuddhamhi māressāsi parājayo;
289. Evaṃ mahānubhāvoti mantvāna nara sārathim,  
Niccaṃ vandatha pūjetha so hi vo saraṇaṃ sadā;

Navamo vijayo.

290. Evaṃ navahi vuṭṭhihi katvā māro mahā bhavaṃ,  
Na tassopaddavaṃ disvā dittakopānalākulo;
291. Gahetvāna tato khippaṃ ṭhapitaṃ attaguttiyā,  
Cakkāyudhaṃ mahātejaṃ kupito khiṇi vegasā;
292. Dhārādharmaṃ tamuggayha kuddho paharate yadī,



Kalīraṃva asajjanto vikhaṇḍeti pajāpati;

293. Tatheva so mahiṃ kuddho māro khipati vegavā,  
Na bhavantosadhā pāṇā visussanti sarādayo;
294. Tatheva kupito tena khipate so mahambudhiṃ,  
Vilayaṃ jalajā yanti sussate so mahaṇṇavo;
295. Evaṃ mahānubhāvo so gacchanto jalambare,  
Patvāna patito nāthaṃ hutvāna pupphacumbaṭaṃ;
296. Tadāsi vijayo tassa sambuddhassa sirīmato,  
Dasame mārayuddhamhi māressāsi parājayo;
297. Evaṃ mahānubhāvoti mantvāna naraśārathiṃ,  
Niccaṃ vandatha pūjetha so hi vo saraṇaṃ sadā;

Dasamo vijayo.

298. Iti kopagginā dittamaṇaṃ māraṃ tadā jino,  
Karūṇājalasekena nibbāpento nisīdi so;
299. Evaṃ katvāpi so kuddho aladdhaviṇṇayo tadā,  
Āmantesi sakaṃ senaṃ palayānalabheravaṃ;
300. Ethāsu vata're mayhaṃ assavā māraṅkarā,  
Nānāvesadharā hotha dhāretha vividhāyudhe;
301. Saddehetāṃ palāpetha yātha gaṇhatha bandhatha,  
Pāde gahetvā khipatha cakkavāḷantaraṃ ito;
302. Athagā saha vācāhi bhiṃsā sā māravāhinī,  
Turaṅga vyaggha mātaṅga sīhādirūpa bhiṃsanā;
303. Sā mārasubhato passe catuvīsatiyojane,  
Ṭhitā pacchimabhāgamhī cakkavāḷasilāvadhī;
304. Bahalattena sā āsi sampuṇṇa navayojanā,  
Yakkha peta pisācādi veschi bhayavāhinī;
305. Saṃvaṭṭa vātasampāta khubhītambudhino viya,  
Ullola bhimaghoso tu gato brahmapurāvadhī;
306. Danta saṅghaṭṭa saṅjāta jālāmālā samākulā,  
Tesaṃgārā'va dittāsuṃ kodhummīlita locanā
307. Vahanti dhūmakkhandaṇi mukhakoṭṭara koṭṭihī,  
Nīhaṭṭā nīhaṭṭā jivhā subhīmoragataṃ gatā;
308. Uddharitvāna tālādi karitvāna sarāsane,  
Bhujāṅge ca guṇe keci gāḷhamākaḍḍhayanti ca;
309. Puṇḍarīkaccha sīhādī khipantābhimukhe tadā,  
Dhāvanteke samuggayha purato dittaṭṭabbate;

310. Bhayānakāti nekāni sīsāneka kalebare,  
Māpayitvāna purato dhāvanti keci kiṅkarā;
311. Sīsena sīhasānkāsā gattena manujopamā,  
Buddhassābhimukhaṃ keci dhāvanti māra kiṅkarā;
312. Kaṅṭhīravākāradehā mukhena khalu rakkhasā,  
Hutvāna abhidhāvanti kecimārassa kiṅkarā;
313. Daṇḍamānavakā sīsabhāgenā'tibhayāvahā,  
Gattena rakkhasā hutvā keci dhāvanti kiṅkarā;
314. Dīpacchebha turaṅgānaṃ vyaggha khaggavisāṇinaṃ,  
Varāha mahisādīnaṃ kaṅṅapāvura bhoginaṃ;
315. Sīsākāra mahāsīse tabbiruddhe kalebare,  
Māpetvā abhidhāvanti keci mārassa kiṅkarā;
316. Ākaḍḍhentā kapolānaṃ karasākhāhi sammukhe,  
Dassayantā mahādāṭhaṃ kecenti māra kiṅkarā;
317. Tikhiṇagganakhā keci phālayantā sakodare,  
Ante gale pilandhitvā dhāvanti kiṅkarāpare;
318. Gilantā keci phaṇino uggirantā tatheva ca,  
Sīsa kandhara kaṅṅanta bāhu aṅguli ādisu;
319. Sakalesu sarīresu visadhūmaggi saṅkule,  
Dhārentā'sivise keci dhāvantyagge bhayāvahā;
320. Padittāyogule gayha khipanteke anekadhā,  
Dittapabbatamuddhacca keci aggikapālake,  
Khipannā abhidhāvanti daṭṭhoṭṭhā bhīmalocanā;
321. Lālayantā sakā jivhā khandhe katvāna muggare,  
Mattabhujāṅga vesena dhāvanti apare bhaṭā;
322. Pibantā lohitāneke khādantā pisite pare,  
Pisācāva'caruṃ keci munirājassa aggato;
323. Ullaṅghantā ca selentā dhāvantā jalitāyudhā,  
Bhimavesadharā yakkhā kecenti bhakuṭimukhā;
324. Paṇuṅṅa saravassehi kuntatomara vuṭṭhihi,  
Bheṇḍivālā'sicakkehi nibbharāsi digantaraṃ;
325. Yaṃ diṭṭha suta mattena maraṇaṃ citta vibbhamāṃ,  
Yāti loko kathaṃ ko taṃ nissesaṃ bhāsate nara;
326. Nekadantasahashehi nikkhantaggisikhāyutaṃ,  
Dānanijjharasampātaṃ bhīmagajjanagajjitaṃ;
327. Nekasata karaggehi dhatāyolaguḷādikaṃ,  
Sannaddhaṃ kavacādīhi giriṃca girimekhalāṃ;

328. Ārūḷho pāpimā tattha ussāpetvā jayaddhajaṃ,  
Visālāvatta dāṭhaggo cipiṭtagga bhagga nāsiko;
329. Daṭṭhoṭṭha bhīmavadano bhakuṭī vali lalāṭako,  
Kodhānalehi sandiddha mahakkho tambadāṭhiko;
330. Nīlapabbata saṅakkāsa visamaṅgo mahodaro,  
Gonatoraga sappādi aṅgikata subhimsano;
331. Sahassabāhuṃ māpetvā chūrikā yaṭṭhi satti ca,  
Kodaṇḍacaṇḍabāṇe ca cakka kuntaḍādi ca;
332. Saṅku vetālikā pharasu pāsamuggara aṅkuse,  
Gahetvā kaṇayaṅcātha tisūla vajirāyudhe;
333. Parivattesi ākāse tesamaṅṅoṅṅa ghaṭṭanā,  
Uggatehi phulīṅgehi dhāvantehi samantato;
334. Aggi cakkaparītaṃca kurumāno nijaṃ tanuṃ,  
Āvahanto bhayaṃ brahma sura siddhādīnaṃ tadā,  
Sa māraseno so māro bhagavantamupāgami;
335. Udayāvalakūṭamhi bhāsantova pabhākaro,  
Suppatiṭṭhitamerū' va tikūṭācala muddhani;
336. Katvāna piṭṭhito bodhiṃ bhūruhaṃ vajirāsane,  
Nisinno bhagavā' tīva niccalo atirocati;
337. Akampo so munī evamagge' kāsī nijaṃ balaṃ,  
Sammappadhānasamyutto dayāmetto mahesiko;
338. Catubuddhabhumisaṅkhāta jayabhūmimudikkhiya,  
Catussaṅghavattūnaṃ yojetvā dvārakoṭṭhake;
339. Yojetvāna thiraṃ tattha saddhādibalakoṭṭhake,  
Satīpaṭṭhānapākāre abhejjindriya gopure;
340. Thiraṅṅāyudhākiṅṅe mettā sannāha vammīto,  
Abhīta bhāratī bhuri bherisaṅkha purakkhato;
341. Caturaṅgaviriyuttuṅga mātaṅgakkhandhasaṅgato,  
Puṅṅāsambhārabhārena kampayaṃ vasudhātalaṃ;
342. Cariyattaya saṅkhāta' mussāpita jayaddhajo,  
Evaṃ vidhāya mārāri mārasaṅgāma maṇḍalaṃ;
343. Dānādayo mahāyodhe āhūya sahaḍātake,  
Suṅātha bho giraṃ mayhaṃ bhavatajja mahā bhavo;
344. Etha yātha samaggaṭṭha na ossakkatha sujḍhatha,  
Vijetaṃ mārayuddhamhī na sakkā' sesajantuhi;
345. Ajja gacchati niṭṭhānaṃ so bho pāramitābhaṭā,  
Sahussāhā mamaggamhi dassetha vīriyaṃ sakaṃ;

346. Atha dānabhaṭo āha apphoṭaṃ diguṇaṃ bhujāṃ,  
Passadāni mahāvīra balaṃ me māradhaṃsane;
347. Paramatthapārami yodhaṃ tathe'va upapāramiṃ,  
Ubho passe karitvāna saseno dhāvi dappavā;
348. Tatheva sīlanā mavho pāramībhaṭa'muttamo,  
Nikkhamma saha senāya mārasenamabhiddavī;
349. Tathānekkhammanāmopi sannaddho'sabhaṭo bhaṭo,  
Mārasenāmige hantuṃ dhāvi dīpī'va sāhaso;
350. Paññāyodho'pi gacchanto sātopo dhāvi dappavā,  
Māramerumahā ajja sasenumūlayāmiti;
351. Vīriyapāramitā yodho daṭṭhoṭṭho bhīmagajjano,  
Sosemi mama tejena vadaṃ'gā māra sāgaram;
352. Khantisaccavhayā ceva tato'dhiṭṭhānako bhaṭo,  
Āsu dhāvimsu pātetuṃ mārasa makaraddhajam;
353. Mettānāmo mahāyodho māro mayhamalanti'gā,  
Upekkhako'pī so yodho mārasenaṃ padālituṃ;
354. Pesetvevaṃ jino senaṃ'sarīraṃ daḷhavikkamaṃ,  
Nisidi tassa tejena nirussāhāsi sā camū;
355. Aho bho vimhayaṃ dāni suṇātha munino mama,  
Jeti eko nisinnova samāraṃ māravāhinim;
356. Kopānalena sandittaṃ duṭṭha ruṭṭhaṃ pajāpatiṃ,  
Aduṭṭho jeti sambuddho ānubhāvo hi tādiso;
357. Dittāyudhe khipante'pi vijjhante vasavattinī,  
Nirāyudho'va taṃ jeti ānubhāvo hi tādiso;
358. Sahātopaṃ sahaṇakāraṃ māraṃ sādambaram tadā,  
Niccalo jeti sambuddho ānubhāvo hi tādiso;
359. Hatthassa rathapattīhi dhāvantaṃ tamitocito,  
Nisinnova jino jeti ānubhāvo hi tādiso;
360. Bhāsantaṃ nekadhā kaṇṇa kaṭhora giramantakaṃ,  
Nissaddo jeti sambuddho ānubhāvo hi tādiso;
361. Māropāgamma aṭṭhāsi laṅghituṃ asamatthako,  
Buddhatejaggi pākāraṃ dittaṃabbhuggataṃ thiraṃ;
362. Tadāha namuci kuddho bhujamukkippa'mīdisaṃ,  
Khippaṃ siddhattha he gaccha santakedaṃ mamāsanam;
363. No ce gacchasi te hadayaṃ phālemi nakhasattihi,  
Vicunṇemi tuvaṃ pāde gahetvā pathavītale;
364. Passa me mahatiṃ senaṃ passa āyudhasaṅcayaṃ,  
Tena taṃ abhimaddāmi tuvaṃ gacchidaṃ mama;

365. Athassa vacanaṃ sutvā jino'ha madhuraṅgiro,  
Kadā te pūritā māra pallaṅkatthāya pāramī;
366. Kadā adāsi sīsādī dānaṃ sīlaṃ kathaṃ tava,  
Tadatthāya kathāpehi ke te paccakkhakāraḥ;
367. Athā'ha pharuso māro netam garu mune mama,  
Ayaṃ sā parisā sabbā tassa paccakkhakāraḥ;
368. Ugghosesi mahāsenā pakkhī'hanti visuṃ visuṃ,  
Bhumudriyana mattova tato kolāhalo ahu;
369. Athāha māro samaṇa ahaṃ sakkhi kathāpayiṃ,  
Tava ko sakkhi yajjatti kathāpehi lahuṃ mama;
370. Athāha bhagavā tassa gambhīraṃ madhuraṃ giraṃ,  
Nicchārentā mayūrassa sunādaṃ phaṇino yathā;
371. Taveva me na santīdha paccakkhatthaṃ sacetanā,  
Acetanāva medāni santi paccakkhavādino;
372. Iti vatvāna mārāri saṅghā jimūta gabbhato,  
Nikkhanta vijjusaṅkāsaṃ karaṃ cāmīkarajjutim;
373. Ratta cīvaragabbhamhā nīharitvā jino tadā,  
Dharaṇyabhimukhaṃ'kāsi uddissa bhūmikāminim;
374. Dānamānādikamme me kampaṇī jātijātiyaṃ,  
Kimajja nissaṇāsī'ti jino vācamudāharī;
375. Sakkhi'hanti vadantīva tato bhūmivaraṅganā,  
Saḷilāvanipariyantā gajjanti nacci tāvade;
376. Mahī sāgara ūmī'va uṭṭhāpenti mahūmiyo,  
Chaddhā kampaṇī kulālassa cakkamvāti pariḍhami;
377. Himavā girirājā ca yugandhara nagādayo,  
Kūṭabāgā samukhippa naccimṣu naṭakā viya;
378. Disvā sutvā tamaccheraṃ gayenubbigga mānasā,  
Mārasenā pabhinnāsi bhinnavelova sāgaro;
379. Bhayenaṭṭassarā bhantā patantaññōñña ghaṭṭanā,  
Vikiritvā kace piṭṭhe dhāvimsu māraṅkarā;
380. Gahitāyudhāni chaḍḍentā pidahantānaṃ karā,  
Nivatthavattamatte'pi dhāvimsu anapekkhakā;
381. Aṅguliyo mukhe keci pakkhipanti rudanti ca,  
Keci vandanti yāvanti abhayaṃ sāmi dehi no;
382. Siddhattho'yaṃ jito kinu nissāsā ruddhabhāsanā,  
Piṭṭhipassamudikkhanti dhāvimsu cakitā pare;
383. Girimekhala'pi nāgindo jannukena patī tadā,  
Māro'pi patito khippaṃ dhāvītvā'dassanaṃ gato;

384. Tañkaṇe uggato āsi satthu kitti jayaddhajo,  
Avahentova surādīnaṃ brahmalokāvadhiṃ gato;
385. Tadāsi vijayo tassa sambuddhassa sirīmato,  
Carime mārayuddhamhi māressāsi parājayo;
386. Evaṃ mahānubhāvoti mantvāna narasārathiṃ,  
Niccaṃ vandatha pūjetha so hi vo saraṇaṃ sadā;

Ekādasamo vijayo.

387. Laddhābhivijaye buddhe nisinne vajirāsane,  
Parivārayuṃ gatāgamma pure viya surādayo;
388. Devā te nikhilā netvā nānāpūjāvidhiṃ tato,  
Santuṭṭhā munino'kāsuṃ mahantaṃ jayamaṅgalaṃ;
389. Sampattātha nisākantā mānetuṃca munissaraṃ,  
Pubbāparambare lagga sasīṇakkaṇṇa bhusaṇa;
390. Sunīlākāsa dhammille dhatta tārālimālikā,  
Vijentīva disā bhāhā phullacūtaka cāmare;
391. Mallikā mukulāsatta sammattāligaṇā tadā,  
Dhamentā viya saṅkhāni kūjenti madhuraṃ giraṃ;
392. Sāmoda makarandehi mandamandānilāgatā,  
Sajuṇhā jinabimbamhi utuṃ gāhenti sītaṃ;
393. Avijjādi mahāmūlaṃ tivaṭṭatthira khandhakaṃ,  
Saṃsāra visarukkhaṃ so āradhummulituṃ tadā;
394. Bhāvento purime yāme saranto khandhasantatiṃ,  
Pubbenivāsānussati ñāṇaṃ laddhā narissaro;
395. Tathā majjhima yāmamhi dibbacakkhu visodhanā,  
Cutupapāta ñāṇaṇca adhigaṃtvāna sabbaso;
396. Rattiyā pacchime yāme cintayanto jarādayo,  
Vipassitvā nāmarūpe āropetvā tilakkhaṇaṃ;
397. Sammasanto kilesehi vivecetvā sakaṃ manāṃ,  
Āsavānaṃ khaye ñāṇā laddhā aggaphalaṃ tadā;
398. Patto nibbāṇanagaraṃ bojjaṅga ratanissaro,  
Saddhammarājā hutvāna pītivācamudāharī;
399. Anekajāti saṃsāraṃ sandhāvissaṃ anibbisaṃ,  
Gahakāraṃ gavesanto dukkhā jāti punappaṇaṃ;
400. Gahakāraka diṭṭhosi puna gehaṃ na kāhasi,  
Sabbā te phāsukā bhaggā gahakūṭaṃ visaṅkhitaṃ,  
Visaṅkhāragataṃ cittaṃ taṇhānaṃ khayamajjhagā;
401. Iceva maggamatadānavidhippavīṇa,  
Kāruṇṇapūṇṇahadayena mahodayena,

Patvā bhavaṇṇavamapāramanantadukkhaṃ,  
Yenocitā paramapāramitā jinena;

402. Yoceva sabbavibhavaṃ paṇuditva rajjaṃ  
Nikkhamma patva calapattamahīruhassa,  
Mūle nisajja sabalaṃ pabalañca māraṃ,  
Pāpārayo ca vijito sa dadātu santim;

Abhisambodhi kathā.

403. Tilokanātho sugato tato tadā  
Udānavācaṃ samudāharitvā,  
Pallaṅkamābhujja dumindamūle  
Cintesi evaṃ vajirāsanasmim;
404. Dānādayo pāramitā cinitvā  
Asaṅkhakappāni ca khepayitvā,  
Asseva pallaṅkavarassa hetu  
Sandhāvitaṃ taṃ bhajitaṃ vayajja;
405. Yāvassu puṇṇa mama cetanāyo  
Tāvettha acchāmi na vuṭṭhahāmi,  
Maṃtvāna so nekasahassasaṅkhā  
Jino samāpatti valaṅgi tattha;
406. Devātidevo tibhavekanātho  
Hatāvakāso jitapañcamāro,  
Pitāmahādīhi mahīyamāno  
Khepesi satthā divasāni satta;

Iti paṭhama sattāhaṃ.

407. Yasmāsaṃ neva jahāti tasmā  
Tisandhiyuttana nisīditeva,  
Ajjāpi kattabbamanena atthi  
Devānamicchāsi manamhi kaṅkhā;
408. Tesam manam so manasā viditvā  
Vinodanatthaṃ vimatintu tesam,  
Uṭṭhāya tamhā nabhamuppatitvā  
Dassesī tesam munipāṭiheram;
409. Vinodayitvā sugato tadevaṃ  
Sudhāsinam cetasi kaṅkharāsim,  
Pallaṅkato uttarapubbakaṇṇam  
Ākāsaṭoruyha jalam ravīva;
410. Jino dumindassa ca āsanassa  
Bahūpakāraṭṭamanussaranto,  
Ṭhito padaṃ kiñci akopayanto  
Ito cito loka na mujjahanto;
411. Nīlāyatakkhāmalakantitoya  
Dhārānipātena dumindarājam,  
Nisiñcamāno divasāni satta

Pūjesi taṃ' nimisalocanehi;

412. Ajjāpi tasmim̐ dharaṇippadese  
Katassa thūpassa tadeva nāmaṃ,  
Ahosi devā ca nara'ragā ca  
Mahenti te tena divaṃ payanti;

Iti dutiya sattāhaṃ.

413. Devā tato devavarassa tassa  
Sucaṅkamaṃ'kaṃsu maṇīhi nānā,  
Pallaṅkato ṭhānavarassa majjhe  
Pubbāparāsāyanamantarāle;

414. Narinda nāginda surinda pūjito  
Chabbaṇṇaraṃsīhi samujjalanto,  
Nīlambare tārakito sasī'va  
So caṅkamī satta ahāni tattha;

415. Ajjāpi tasmim̐ dharaṇippadese  
Katassa thūpassa tadeva nāmaṃ,  
Ahosi devā ca naroragā ca  
Mahenti te tena divaṃ payanti;

Iti tatiya sattāhaṃ.

416. Tato dumindassa surāsurindā  
Mahītale pacchimottarāyaṃ,  
Māpiṃsu nānāratanaḷayaggaṃ  
Nisajja pallaṅkavare tahiṃ so;

417. Sududdasāgādhamapārapāraṃ  
Samantapaṭṭhānatarāṅgabhaṅgiṃ,  
Dhammodadhiṃ ṇāṇasumerumatthā  
Sālodayaṃ khepayahāni satta;

418. Ajjāpi tasmim̐ dharaṇippadese  
Katassa thūpassa tadeva nāmaṃ,  
Ahosi devā ca naroragā ca  
Mahenti te tena divaṃ payanti;

Iti catuttha sattāhaṃ.

419. Tato jino gantva'japālamūle  
Vimuttijaṃ sādupalāṃ' nubhonto,  
Sattāhamattaṃ ativattayī so  
Devātidevo karuṇāguṇaggo;

420. Tadāgatā māravadhū munitdaṃ  
Palobhituṃ yā pituno sakāsā,  
Tāsaṃ payogampidha bindumattaṃ  
Kathīyate taṃ samupāgatattā;

421. Tadā sa māro samare jinena  
Parājito socanako'pagaṃtvā,



- Pajjhāyamāno'tha adhomukho'ca  
Nisīdi tuṅhī vilikhaṃ chamāyaṃ;
422. Parājayaṃ mayha mameva doso  
Na tassa kasmāhamayaṃ'ca nāsiṃ,  
Sīsakkhimaṃsādi ca puttadāre  
Nādanti evaṃ manasī karonto;
423. Pavattimetāṃ makaraddhajassa  
Sutvāna taṅhā aratī ragā ca,  
Yatthacchi māro parisocayanto  
Tatthāgamuṃ tā cakitā khaṇena;
424. Disvāna taṃ tatha tathā nisinnaṃ  
Nissāsaruddhaṃ giramuggirantī,  
Tusāra bindunivahehi'sāra  
Paṅkeruhākāra visālanettā;
425. Hā tāta hā tāta kimāsi tedāṃ  
Naṅṅhannu te kiṃ vada patthasī kiṃ,  
Ko te diso kena parājito'si  
Kimānayissāma hanāma kaṃ no;
426. Kimhotiyodāni na passathetaṃ  
Suddhodanīyaṃ tatakittighosaṃ,  
Mukhamhi mayhaṃ masimakkhayantaṃ  
Aticca yantaṃ visayaṃ pasayha;
427. Na bhāriyā tāta manussabhūtaṃ  
Kattuṃ vasaṃ ko vasameti nāmhaṃ,  
Taṃ rāgapāsena gajaṃ'va mattaṃ  
Subandhakaṃ bandhiya ānayaema;
428. Na rāgapāsena hi ānanīyo  
Mārassa dheyyaṃ samatikkamīva,  
Apetarāgo arahā akampo  
Sovāma tasmā subhagā tanujā;
429. Sacetano so hi manussabhuto  
Acetanañce samupāgamāma,  
Karoma taṃ no vasagaṃ kimettha  
Cittaṃ balaṃ passatha no khaṇena;
430. Rūpena nettaṃ sumanoharena  
Gandhena ghāṇaṃ savaṇaṃ sarena,  
Phassena gattaṃ rasasā rasaññaṃ  
Manaṅca pāsena ca kāmajena
431. Subāhupāsena ca tassa gīvaṃ  
Bāhudvayaṃ dhāritamāladāmā,  
Bandhitvadāneva tamā'nayāma  
Balañhi no passatha tāta'dāni;
432. Vatvāna evaṃ vacanaṃ pitussa  
Paṇamma pādāni pagabbhitantā,

Yatthacchi mārāri virocamāno  
Tatthā'gamuṃ khippamudaggacittā;

- 433.** Sāmodamālākulakesabhāra  
Payodharā kuṅakkumahārihārā,  
Bimbāddharā cārusabhā pabhāsā  
Ummādayantī janamānasāni;
- 434.** Muddhena missaṃ madhure nimuggaṃ  
Snehena tintaṃ rasato'nuviddhaṃ,  
Bhāsiṃsu vācaṃ hadayaṅgamantā  
Vilokaneneva dhitiṃ harantī;
- 435.** Vasantakanto navayobbano'si  
Suvaṇṇavaṇṇo hadayaṅgamo'si  
Eko nisinno'si vaṭassa mūle  
Simantinī sāmi kuhinnu tuyhaṃ;
- 436.** Taraṅgahīno'pi taraṅgamālī  
Sasaṅkahīnā rajanī ca sāmī,  
Haṃsā'lihīnā sarasī suphullā  
Nābhāti kantā virato dhavo'pi;
- 437.** Vasantakālo ca vanaṃ suphullaṃ  
Nisākarābhā bhamarāligītaṃ,  
Sugandhamandopagatā samīrā  
Virocasi tvampi ca yobbanena;
- 438.** Mayampi cettveva samāgatamha  
Mano'nukūlā ca manuññarūpā,  
Karoti kiṃtva'jja sakāmadāho  
Kāmākaro'dāni samāgato no;
- 439.** Mā tedisaṃ yobbanarūpasāraṃ  
Suviggahaṃ chādaya cīvarena,  
Teneva no nettamanamhi sāmi  
Mā dehi dāhaṃ tava dāsibhute;
- 440.** Nakhaṃsu sutte'ruṇapānipāde  
Nettindanīlāni'va āvuṇanto,  
Tvamacchi no sāmi mukhambujesu  
Na enti kinte nayanālimālā;
- 441.** Sudhāsīlāgīñjaka lohadāru  
Jātehi tvaṃ dhīra na nimmito'si,  
Rūpī'si sommo'si tathāpi sāmi  
Kiṃ kāmarāgaṃ manasā nudesi;
- 442.** Ayañca bālā caturā ratīsu  
Bāleti kaṅkhaṃ jaha mānasamhi,  
Kiṃ mañjarī bhijjati sampaphullā  
Mattārirāje paricumbamāne;
- 443.** Ayañca rāmā ramaṇīyarūpā  
Pīṇoruṅgaṇḍā kuvamaṇḍalā ca,

Taṃ kāmīniṃ kāmaya phullakañje  
Haṃso yathā kesara sampagiddho;

444. Cintāmaṇiṃ bhaddaghaṭaṅca kappa  
Taruṃ samāpajja daḷiddabhāvā,  
Nāpenti sattā khalu dubbhagattā  
Tatheva no'sī tava pādasevā;

445. Evañhi tā rañjanamañjubhāsā  
Sahassamekaṅca satāni aṭṭha,  
Vesāni sammā abhinimmiṇitvā  
Palobhayuntaṃ bahūdhā munindaṃ;

Tato taṇhā?

446. Yakkhosi mattosi silāmayosi  
Acetanosā'tha ayomayosi,  
Avītarāgañhi sacetanañce  
Anenupāyenu'pasaṅkamāma;

447. Phaleyya khīppaṃ hadayañhi tassa  
Uṇhaṃva rattaṃ mukhatu'ggameyya,  
Siyāva khippaṃ api cittakhepaṃ  
Ummādbhāvaṃca sa pāpuṇeyya;

448. Yathā palutto haritopalamhi  
Khitto naḷo sussati ātapena,  
Evaṃ visusseti visādameṭi  
So mucchati muyhati dukkhameti;

449. Sokāvakiṇṇe nu vanamhi jhāyasi  
Vittannu jīto uda patthayāno,  
Āgunnū gāmasmiṃ akāsi kiñci  
Janena kasmā na karosi sakkhiṃ;

Satthā?

450. Atthassa pattiṃ hadayassa santiṃ  
Chetvāna senaṃ piyasātarūpaṃ  
Eko'haṃ jhāyaṃ sukhamanubodhiṃ  
Janena tasmā na karoma sakkhiṃ;

Imā dve pāliyaṃ?

451. Paluṭṭhagattaṃ dahanena makkaṭiṃ  
Susānapetiṅca jigucchanīyaṃ,  
Jegucchiyaṃ jaṅgama mīlharāsīṃ  
Disvāna ko taṃ varaye sapañño;

Atha aratī?

452. Kathaṃ vihārī bahulo ca bhikkhu  
Pañcoghatiṇṇe atarīdha chaṭṭhaṃ,  
Kathaṃ jhāyiṃ bahulaṃ kāmasaññā  
Paribāhirā honti aladdha yo taṃ;

Satthā?.

453. Passaddhakāyo suvimuttacitto  
Asaṅkharāno satimā anoko,  
Aññāya dhammaṃ avitakka jhāyī  
Na kuppātī nassaratī na thīno;

454. Evaṃ vihārī bahulo ca bhikkhu  
Pañcoghatīṇṇe atarīdha chaṭṭhaṃ,  
Evaṃ jhāyīṃ bahulaṃ kāmasaññā  
Paribāhirā honti aladdha yo taṃ;

Atha ragā?.

455. Acchecchi taṇhaṃ gaṇasaṅghacārī  
Addhā tarissantī bahū ca saddhā,  
Bahū vatāyaṃ janata'manoko  
Acchijja nessati maccurājassa pāraṃ;

Satthā?.

456. Nayanti ve mahāvīrā saddhammena tathāgatā,  
Dhammena nayamānānaṃ kā usūyā vijānataṃ;

Imā pañca pāliyaṃ?.

457. Sutvāna taṃ dhammavaraṃ jinassa  
Pamattabandhussa ragādirāmā,  
Palobhituṃ ne'va samatthakā taṃ  
Agaṃsu khippaṃ pituno sakāsaṃ;

458. Māro tadārā'va samekkhamāno  
Disvāgatā kevalameva tāyo,  
Mā kattha kāmaṃ mama bhāsītāni  
Kāmattha pātuṃ migataṅhikāpaṃ;

459. Bālā kumudanālehi pabbataṃ abhimanthatha,  
Giriṃ nakhena khaṇatha ayo dantehi khādatha;

460. Selaṃva sirasi ūhacca pātāle gādhamesatha,  
Khānuṃva urasā'sajja nibbijjāpetha gotamā;

Imā dve pāliyaṃ?.

461. Vatvāna evaṃ vimano sa māro  
Saṭṭituko sambhavanaṃ payāsi,  
Satthātha rāgā parimuttacitto  
Jahāsi tasmiṃ divasāni satta;

462. Ajjāpi taṃ sākhivarampitena  
'Nubhutamattena mahenti sabbe,  
Teneva te saggagatā vimāne  
Modanti kāmehi anūpamehi;

Iti pañcama sattāhaṃ.

463. Tato munindo mucalindamūle  
Nisīdi gantvā pavarāsanamhi,  
Yugandhare bālaravī'va raṃsi  
Jālāhi lokam paripūrayanto;
464. Athāna megho jaladā satehi  
Papūrayam kham thanayam savijju,  
Sasītavāto kiramambudhāram  
Virocamāno visakaṇṭhikāhi;
465. Amandanaṇdo mucalindabhogī  
Disvā munindam mucalindamūle,  
Parikkhipitvāna visālabhogā  
Chādetva sammā saphaṇo phaṇena;
466. Ajjhesi so tassa anuggahāya  
Nisīdi gantvā bhujagā'sanamhi,  
Satthā tadā rūpiyamandireva  
Sattāmahattaṃ suvimuttacitto;
467. Ajjāpi taṃ sākhivarampi tena  
'Nubhutamattena mahenti sabbe,  
Teneva te saggagatā vimāne  
Modanti kāmehi anūpamehi;

Iti chaṭṭhama sattāham.

468. Tato'pagantvā yatirāja rājā  
Nisīdi rājāyanassa mūle,  
Vimuttijam pītisukham'nubhonto  
Sattāhamattaṃ karuṇāguṇaggo;
469. Ajjāpi taṃ sākhivarampi tena  
'Nubhutamattena mahenti sabbe,  
Teneva te saggagatā vimāne  
Modanti kāmehi anūpamehi;

Iti sattama sattāham.

470. Āhāra kiccādi vivajjitassa  
Sukhānubhontassa vimuttijāni,  
Sampīṇitaṅgassa jinassa tassa  
Iccaccagum sattadināni satta;
471. Devānamindena tato'panīta  
Mukhodakādimpāribhuñjijyāna,  
Nisinnamatte yatirāja rāje  
Tatthā'gamum dve vāṇijā khaṇena;
472. Ussāhitā devavarena sammā  
Sālohitā tassa tapussa-bhallikā,  
Manthaṅca sādum madhupiṇḍikaṅca  
Ādāya nātham idamabruvunte;
473. Idañhi no dhīra anuggahāya

Paṭiggahetva paribhuñja dānaṃ,  
Hitāya taṃ hoti sukhāya ceva  
Anappakappesu anāgatesu;

474. Paṭiggahetvā muni devadinna  
Pattena paccagghasilāmayena,  
Bhutvāna tesam anumodanattham  
Desesi dhammam varadam pasattham;
475. Dve bhātikā vāñjakā jinassa  
Dhammam suñitvāna pasannacittā,  
Dve vācīkopāsakataṃ gatāsum  
Yāciṃsu te taṃ puna pūjanīyam;
476. Parāmasitvāna siraṃ tato so  
Adā jino kuntala dhātumuṭṭhiṃ,  
Te tena tuṭṭhā sumanā patītā  
Mahiṃsu netvā vibhavānurūpaṃ;
477. Sathā'tha gantvā ajapālamūle  
Sahassa raṃsīva yugandharamhi,  
Nisajja lokaṃ anulokayanto  
Vitakki evaṃ manasā vitakkaṃ;
478. Mayajjhapanno varadhammasāro  
Sasassa sindhū'va agādhapāro,  
Abuddhasattehi tamajja kassa  
Pakāsayissañhi jaḷo hi loko;
479. Desemi ce dhammavaram pañītam  
Kilantabhāvova mamassa asmā,  
Kimattadukkhe niti cintayanto  
Nuyyāmamākā muni desanamhi;
480. Sahampatī nāma tato vidhātā  
Sacetasā tassa manaṃ viditvā,  
Vinassatīdam khalu sabbalokaṃ  
Adesite teni'ti kampamāno;
481. Sakāsamāgamma jinassa tassa  
Sagāravo brahmagaṇena tattha,  
Nihacca jānuṃ pathavītalami  
Namassamāno idamabrūvī so;
482. Tvaṃ devadevo sa sumedhakāle  
Palokitaṃ lokamudikkhamāno,  
Vihāya dīpaṅkarapādamūle  
Laddhā'mataṃ taṃ karuṇāguṇena;
483. Pavissa saṃsāravanaṃ viduggaṃ  
Maṃsakkhisīsādima'dāsi dānaṃ,  
Vedesi dukkhaṃ amitaṃ asayaṃ  
Taṃ te parattham'va na attahetuṃ;
484. Santīdha sattā khalu mandarāgā

Ñātuṃ samatthā sugatassa dhammaṃ,  
 Ārādhito me karuṇāguṇaggo  
 Desehi dhammaṃ anukampamāno;

485. Kāle vikāsanti kharaṃsu missā  
 Thalambujātā kusumāni nānā,  
 Tathe'va te dhammakarābhiphuṭṭhā  
 Vikāsamāyantī janā anekā
486. Sampanna vijjācaraṇo satīmā  
 Jutindharo antimadehadhārī,  
 Paṭiggahetvāssa nimantaṇaṃ so  
 Janesi satte karuṇā manasmim;
487. Apārutā tesam amatassa dvārā  
 Ye sotavanto pamuñcantu saddham,  
 Vihimsasaññī paguṇaṃ na bhāsim  
 Dhammaṃ paṇītaṃ manujesu brahme;
488. Paṭiggahesīti udaggacitto  
 Ajjhesanaṃ me caturāṇano so,  
 Natvāna nāthaṃ sahapārisajjo  
 Pakkāmi tamhā bhavanaṃ khaṇena;
489. Tato jino tena gahitanuñño  
 Desemi kaseti udikkhamāno,  
 Ālāra-udde samudikkha dhīro,  
 Mantvāna tesam aciraccutittaṃ;
490. Kahannukho'haṃ varadhammacakkaṃ  
 Aññaena kenāpi avattanīyaṃ,  
 Lokassa cintāmaṇisantibhaggaṃ  
 Pavattayissantī vicintayanto;
491. Disvāna bhikkhū muni pañcavagge  
 Ādāya pattañca ticīvarañca,  
 Bārāṇasiyaṃ migadāyamento  
 Addhānamaggaṃ paṭipajji satthā;
492. Tathāmarabrahmagāṇehi pūta  
 Pathe phaṇī pakkhi catuppadā ca,  
 Āraññadevā tarupabbatā ca  
 Mahimsu nekehi suvimhayehi;
493. Tatopagā so migadāyamagge  
 Disvā yatīsaṃ yatayo'pagantvā,  
 Akāṃsu vattaṃ paṭipattisārā  
 Pavattayī tattha sa dhammacakkaṃ;
494. Aññādikoṇḍaññavasippadhānā  
 Koṭīnamatṭhārasa kañjayonī,  
 Asītikoṭī'pi sudhāsi saṅghā  
 Aññāsumaggaṃ kamato tadā te;
495. Aticcayātamhi nidāghakāle

- Vassānakāle samupāgatasmim,  
Tattheva vassaṃ upagamma dhīro  
Temāsamattaṃ avasī vasīso;
- 496.** Tato yasaṃ tassa sahāyakepi  
Paṭiṭṭhapetvā arahattamagge,  
Bhutiṃ janānaṃ anubrūhayanto  
Vassassa antaṃ akarī tahiṃ so;
- 497.** Vassaccaye lokavidū munindo  
Āmantayī te yatayo saputte,  
Te'thāgamuṃ nibbaṇathā katañjalī  
'Damabruvi tesama'nanta pañño;
- 498.** Ugghosayantā mama dhammaghosam  
Samāhanantā mama dhammabheriṃ,  
Sādhuṃ dhamentā mama dhammasaṅkhaṃ  
Carātha tumhe sanarāmarānaṃ;
- 499.** Jayaddhajaṃ me bhuvanukkipantā  
Ussāpayantā mama dhammaketuṃ,  
Athukkipantā mama dhammakuntaṃ  
Carātha lokesu sadevakesu;
- 500.** Susajjitattaṃ amatassa maggaṃ  
Sakaṇṭakattaṃ narakāyanassa,  
Mārānanasmim masimakkhitattaṃ  
Kathetha lokassa sadevakassa;
- 501.** Buddhantaraṃ suppihitaṃ acāraṃ  
Purassa mokkhassa visāladvāraṃ,  
Avāpurī no bhagavā'dhunā bho  
Yathajja sabbetī nivedayavho;
- 502.** Uppannabhāvaṃ bhuvane mamaṃja  
Tattheva dhammassa ca pātubhāvaṃ,  
Uppannabhāvañca mamorasānaṃ  
Pakāsayantā jagatiṃ carātha;
- 503.** Vanamhi pante girigabbharāyaṃ  
Rukkhaṃ mūle'pi ca suññā'gāre,  
Vasaṃ yatattā mama dhammamaggaṃ  
Desetha loke sanarāmarānaṃ;
- 504.** Vatvāna evaṃ yatayo disāsu  
Pesetva nātho uruvelagāmī,  
Paṭipajji maggaṃ atha antarāle  
Kappāsikavhaṃ vipinaṃ pavissa;
- 505.** Tasmim ramante samatiṃsamatte  
Rājorase so pavaro vinetvā,  
Datvā'mataṃ dhammamathuddisitvā  
Agoruvelaṃ gajarājagāmī;
- 506.** Tatthoruvelādhikakassapoti



Pasiddhanāmassa sasissakassa,  
 Aggaṃ phalaṃ so paripāvayanto  
 Vasī vasante vasīnaṃ varittho;

507. Tadāharuṃ negama nāgarā ca  
 Yaññaṃ mahākassapa tāpasassa,  
 Jino viditvāssa manaṃ manena  
 Vasī visuṃ tassa pasāda hetu;

Kathaṃ?

508. Gantvāna uttarakuruṃ bhagavā tadāni  
 Piṇḍaṅcaritva ramaṇīya himālayaddiṃ,  
 Āgamma sādūrasa nīra bharābhirāme  
 'Notattake munivaro paribhuñjīyāna;
509. Cintesi evamahamappataramva kālaṃ  
 Thassāmi sāsana mamañhi anāgatesu,  
 Laṅkātale bhavati tattha idāni yakkha  
 Sambādhamatthi mama tattha gatesu' dāni;
510. Sabbā'manussaja bhayaṃ pavinassatī'ti  
 Mantvā tato yativaro karuṇāya satte,  
 Sañjhāghanehi parinaddha ravīva ratta  
 Nigrodhapakka sadisaṃ carapaṃsukūlaṃ;
511. Dhāretva selamaya sundara pattahattho  
 Chabbaṇṇaramsi nivahaṃ disi pūrayanto,  
 Sambodhito navama phussaja puṇṇamāyaṃ  
 Laṅkātaṃ vijayituṃ nabhasā' gamāsi;
512. Brahmāsuraṃ phañi garuḷā ca siddha  
 Vijjādharādi janatā sahapārisajjā,  
 Ketā'tapatta ghaṭa dīpuru toraṇehi  
 Pūjaṃ akaṃsu mahatiṃ gaganāyanamhi;
513. Laṅkaṅganā urasi bhāsura tāra hāra  
 Saṅkāsa sītala manohara nīra pūrā,  
 Tasmīṃ mahādīpada vāluka nāma gaṅgā  
 Bhumajjhagāsi jana netta harābhirāmā;
514. Tassāvidūra suci rammatāre padese  
 Āyāmato mitatiyojana vitthatena,  
 Cattāri gāvutamitaṃ nayanābhirāmaṃ  
 Āsāra sītajala nijjhara bhurighosaṃ;
515. Mattālipāli khaga gītija missarāgaṃ  
 Sammatta citta migasaṅgha nisevitaṃ taṃ,  
 Naccanta nekasikhi saṅgata pādapiṇḍaṃ  
 Uyyānamāsi urunāgavanābhīdhānaṃ;
516. Ramme tadā ratanadīpavaramhi laṅkā  
 Lokābhīdhāna harikaṇḍaka yakkhadāse,  
 Odumbare sumanakūṭaka taṇḍuleyye  
 Selesu māragiri missakaritthānāme;

517. Ye'ññepi santi girayo vanarāmaṇeyyā  
Gaṅgā nadī giriguhā sikatātālā ca,  
Tatthāvasanti rahasā pharusāniruddā  
Pāṇātipāta niratā saṭhakūṭa yakkhā;
518. Saṅgama te mahati nāgavanamhi tamhi  
Sammantayimṣu sabhaṭā saha pārisajjā,  
Tvam ko'si re! Iti paro aparaṃ kharena  
Tikkhena vādakaṇayena aruntudantā;
519. Kujjhimṣu te athitarītara kāraṇena  
Vākyena yuddha pariraddha pagabbhitattā,  
Saṅkhābhītāpaga patīva'navatṭhacittā  
Sārambhagabbhitamanā parirāvayanti;
520. Tasmimṃ khaṇe'bhimatado sugato nabhamhi  
Āgamma tesa'manukampita mānasena,  
Gopānasī sama manohara raṃsimāli  
Tatthacchi khe guṇamaṇī maṇikaṇṇikāva;
521. Tesamṃ jino kalahavūpasamāya hetu  
Māpesi vuṭṭhi timirā'nilasītabhītiṃ,  
Tatthāsī gajjitaghano suracāpakhitta  
Dhārāsarehi vitudaṃ nisivāra saṅghaṃ;
522. Andhāva te ghanatare timire nimuggā  
Mulhā disaṅca vidisaṃ na vidimṣu bhītā,  
Caṇḍāniluddhaṭa mahā girikūṭarukkha  
Sampāta bhīta ruditā gatimesayanti;
523. Sītena te atha dije parikoṭayantā  
Aññoññagattamavalamba parodayimṣu,  
Rūpāni nekabhayadāni ca ghosaṇāni  
Vattimṣu tena vividhaṃ bhayamāsi tesamṃ;
524. Buddhāpi dukkhitamanā paradukkhakena  
Kasmā karonti anayaṃ'ti na cintanīyaṃ,  
Loko hanāti viṭapi phaladāna hetu  
Satthena soma ripugāhaka vāsaramhi;
525. Satthā tato tamanudo sabhaye sasoke  
Disvāna guyhaka jane karuṇāyitatto,  
Vuṭṭhimṃ tamaṅca pavanaṃ paṇuditva sabbamṃ  
Dassesī attamakhilaṃ dumaṇīva khamhi;
526. Disvāna te munivara'ñjali paṅkajehi  
Sajjetva sīsa sarasī idama'bruvimṣu,  
Yācāma no'bhayapadaṃ bhavato sakāsā  
Dāsesu dhīra karuṇaṃ karaṇīyameva;
527. Evaṃ tadā'vaca jino madhurassarena  
Āmanta te niscare'vanate samekkha,  
Tumhe dadātha yadi ṭhānamamekadesaṃ  
Sabbe apentī ghanavātaja sītadukkhā;

528. Yajjevamītima'payāti karoma bho taṃ  
Gaṇhāhi dhīra yadi icchasi sabbadīpaṃ,  
Vatvāna tehi paridinna chamāya maggo  
Ogamma tattha puthu patthari camma kaṇḍaṃ;
529. Tasmim nisajja kaṣiṇaṃ samāpajja tejo  
Jālākulaṃ jalita maggimamāpayī so,  
So dhūmaketu gaganuggata tuṅgasiṅgo  
Sandadḍhayaṃ girivanānu'rughosayanto;
530. Rukkhehi rukkhavana pabbata laṅghanena  
Sākhāmige ca vihage anubandhayaṃ'va,  
Vessānaro vanamarū migasūkare'pi  
Sandhāvi guyhaka jane iti cintayanto;
531. Disvāna tattha pacurātana vipphuliṅga  
Sammissa jāla dahanam guhakā samecca,  
Dhāvum vikiṇṇakaca bappajala'ddanettā  
Dārattajehi sahitā gatimesamānā;
532. Sambuddhateja paridaḍḍha sarīracittā  
Āhacca sāgarataṭaṃ paridhāvamānā,  
Tasmimpi te pavisitum saraṇaṃ na laddhā  
Chamhi tato sapadi sannipatiṃsu sabbe;
533. Disvāna te munivaro sahaye sasoke  
Rammaṃ tadā jaladhimaṃjagataṃ mahantaṃ,  
Iddhīhi sehi giridīpami'dhānayitvā  
Āropayitva nikhile puna tattha'kāsi;
534. Katvevame'samasamo'pasamanta'mītiṃ  
Tattheva bhāsurataro bhagavā nisīdi,  
Brahmāmarā'suraphaṇī garuḷādi siddhā  
Saṅgamma'kaṃsu mahatiṃ mahama'ggarūpaṃ;
535. Desesi saṃsadi jino sutisādhu dhammaṃ  
Tasmim sadāsavanudaṃ sivadaṃ janānaṃ,  
Sutvāna nekasatakoṭi pamāṇa pāṇā  
Laddhā tadā samabhavum caradhammacakkhum;
536. Tasmim dine sumanakūṭa varādhivāso  
Tejiddhibuddhivibhavo sumanābhidhāno,  
Devo pasannahadayo ratanattayamhi  
Sampāpuṇittha paṭhamaṃ phalamuttamaṃ so;
537. Uṭṭhāya tuṭṭhavadano katapañjalīko  
Muggo jinagga nakharaṃsi payodadhimhi  
Vanditva evamavacā'tula vīra dhīra  
Lokagga puggala varam dāda sāmī dhīsa;
538. Dāsosmi te caraṇa paṅkaja pūjakohaṃ  
Saddhādayādi vibhavo tanayo'hamasmi,  
Tumhe vinā khaṇalavaṃ vasitum na icche  
Tasmā dadātu bhagavā mama pūjanīyaṃ;
539. Sutvāna taṃ dhitimatī parimajja sīsaṃ  
Saṃsatta chappada saroruha sannibhena,

- Hatthena nīla saka kuntala dhātumuṭṭhiṃ  
Dajjātha so maṇimayena karaṇḍakena;
540. Paggayha bāhuyugalena ṭhīto namitvā  
Muddhā dadhāsi makuṭaṃ viya pīṇitatto,  
Katvā'tha so vara mahamaṃ tidivehi saddhi  
'Mappetva dhīra pharibhutta vasundharāyaṃ;
541. So'kāsi nīlaratanehi mahārahehi  
Ubbedhato ratana satta pamāṇa thūpaṃ,  
Nāthe dharantasamayeva patiṭṭhahī so  
Thūpo tilokasukhaddo maṇi kāmado'va;
542. Pacchā tilokasarāṇe parinibbutamhi  
Khīṇā savo samahimo sarabhu yatindo,  
Ādāya taṃ citakato jinagīvadhātum  
Tasmiṃ nidhāya'kari bārasa hatthathūpaṃ;
543. Cūḷābhayahvavanīpo samaye'parasmiṃ  
Battiṃsa hatthama'kariyattha varoruthūpaṃ,  
Duṭṭhādigāmaṇi nupo damiḷe hananto  
Kāresi kaṅcukamatho catusaṭṭhihatthaṃ;
544. Evaṃ sa sīhalamahāsaramajajharūḷhaṃ  
Setambujama'va madhupāvali sevanīyaṃ,  
Bhumaṅgaṇā karatale sitavitthalīlo  
Thūpo dadātu masamopasamaṃ janānaṃ;
545. Laṅkopasaggama'vadhūya vidhāya khemaṃ  
Laṅkaṃ nijāya varakuntala dhātuyā taṃ,  
Katvāna bhāsurataraṃ muni maṅgalāya  
Pāyāsi tāraḷa pathe'nuruvelameva;
546. Tasmiṃ vidhāya bahuvimhita pāṭiheraṃ  
Bhetvā sasissaki'sino puna diṭṭhijālaṃ,  
Datvāna nibbutipadaṃ sahasissakassa  
Nibbāṇa sundara puraṃ paripūrayittha;
547. Tamhā vikāsita kusesaya kānanābha  
Vītāsavehi nivuto sugatebhagāmī,  
Pāyāsi rājagaha gāmī'mudāramaggaṃ  
Veneyya jantu kamalākara bhānurūpo;
548. Tasmiṃ gate jinavare vara bimbisāro  
Pūjama akāsi mahatiṃ saha devatāhi,  
Tasmiṃhi saṃsadi labhiṃsu anappapāṇā  
Magge phale ca sarāṇe ca patiṭṭhahiṃsu
549. Rājā tato vipula veluvanābhirāmaṃ  
Sālaṅkataṃ vividha pādapa maṇḍapehi,  
Pādāsi dakkhiṇakare jalapātanena  
Katvā dharādharadharaṃ himavaṅca kampaṃ;
550. Tasmiṃ samantanayano nayanābhirāmo  
Bhutiṃ janassa satataṃ abhivaḍḍhayanto,

Dhammambu vuṭṭhi nikaraṃ parivassayanto  
Vassaṃ vasī adutiyo dutiyamhi vasse;

551. Devinda moli samalaṅkata pādapiṭṭho  
Lokassa atthacaraṇe satatābhiyutto,  
Tattheva so hi tatiye'pi catutthavasse  
Vāsaṃ akāsi sugato sirisantivāso;
552. Lokassa dhamma ma'malaṃ satataṃ vahanto  
Sāvattiyaṃ rucira jetavane' bhirāme,  
Vāsaṃ akāsi sukhado munipaṅcamasmim  
Veneyya sattasamayaṃ samudikkhamāno;

Iti laṅkāya paṭhamā' gamaṇaṃ.

553. Atha bhagavati tasmim jetanāme vanasmim  
Nivasati satilaṅkā maṅgalā' vāsarūpā,  
Upavanamiva nāke nandaṇaṃ devatānaṃ  
Amara uragavāsā rammarūpā babhūva;
554. Tahimati rucirasim vaḍḍhamānādi sele  
Madhura salilavāhe rammakalyāṅikādo,  
Udadhi bhujagavāse nāgadīpantike ca  
Mahati mahima yuttā nāgasāṅghā vasanti;
555. Pacura mahima yutto vaḍḍhamānācalasmim  
Adhipati bhujagānaṃ āsi cūlodaravho,  
Mahudara iti nāmo nāgadīpodadhimi  
Nivasati atha tesam pabbateyyo' ragindo;
556. Itara bhujaga raṅṅo dhītaraṃ nāgakaṅṅaṇaṃ  
Piyatarama' bhirūpaṃ' kāsī dāraṃ tadā hi,  
Atha ca duhituyā so dīyamānaṃ dadanto  
Rucira maṅṅimayaggaṃ āsanaṅcāpadāsī;
557. Duhitari matakāle te'tha pallaṅkahetu  
Jalaja thalaja nāgā yuddhasajjā ahesuṃ,  
Atha thalaja bhujāṅgā bhaṅgakallolamālā  
Sadisa lūlita cittā gabbitevaṃ ravanti;
558. Kimu' dadhija phaṅṅinaṃ kitti sampattiyā no  
Api yasaparivārā kiṃ baleniddhiyā kiṃ,  
Ahamahamīti gabbā kiṃ kimissāya tesam  
Bhavati timira' rīnaṃ bhānumaggunnatī kā;
559. Atha jalaja' lagaddā gajjanaṃ gajjayantā  
Bhayajanaṃ pagabbhā phoṭayantā bhūjanaṃ,  
Ahamaha pabhū re! Re! Pabbateyyāna' metam  
Paṭutaraḍasitoṭṭhā kakkha' levaṃ ravanti;
560. Paṭutara garunādā tāva gajjanti dantī  
Nayana pathamu' pente yāva kaṅṅhiravānaṃ,  
Tathariva thalajāta jumhayantā samaggā  
Nayana pathagatā no suṅṅadappā bhavanti;

561. Iti tadubhayasenā ghaṭṭayantā'ññamaññaṃ  
Vividha paharaṇho uggirantī giranti,  
Satata khubhita velā sāgarūmīva bhantā  
Lulita lulita cittā yuddhaninnā ṭhitāsum;
562. Atha tadahu munindo yāminīyāma'mante  
Patiniya matijālaṃ lokamolokayanto,  
Samara vasagatānaṃ bhogīnaṃ bhāvibhutiṃ  
Tadupari ca'bhivuddhiṃ passi laṅkātalassa;
563. Atha muni madhumāse'posathe kālapakkhe  
Kata nikhila vidhāno gayha saṅghāṭikādīṃ,  
Anugatikamudikkhaṃ pañcanetto samantā  
Sumana sumana nāmaṃ passi devaṃ samiddhiṃ;
564. Tadahu sumanadevo jetanāme suramme  
Adhivasati vihāre dvārakoṭṭhopakaṭṭhe,  
Ṭhita viṭapa samiddhe khīrikāpādapasmīṃ  
Sugata mabhinamanto anvahaṃ pūjayanto;
565. Tamasammuni disvā'mantayitvā'gate taṃ  
Idamavaca mayā bho saddhimāgaccha laṅkaṃ,  
Saha tava bhavanamhā pubbavutthappadese  
Tava bhavati patiṭṭhā bhoginañjā'bhivuddhi;
566. Atha munivacanaṃ so muddhanāma'ggahetvā  
Samuditahadayo taṃ rukkhamuddhacca mūlā,  
Sugatamupari katvā dhārayanto suphullaṃ  
Barihi barihi chattākāramāgā nabhamhī;
567. Dasabala tanubhā'bhissaṅgamā so dumando  
Tarala maṇīva nānā'bhāhi sambhāvanīyo,  
Vilasita iva sabbe rukkhaseḷādayo'pi  
Apagata sakavaṇṇāvaṇṇavantā virejuṃ;
568. Khaga bhujaga surādi massitā chappabhāhi  
Nijapati nijajāyā svaññamaññaṃsu muyhuṃ,  
Asita gagana majjhe sobhamāno munindo  
Vitata vividha raṃsī raṃsimālīva gañchi;
569. Jalada paṭala saṅḍe vajjhamuddālayitvā  
Bahi vilasitakāyo sammadosākaro,va  
Katupari taruchāyo jotamāno samāno  
Uruga samaraṭhānaṃ ganthvā'kāse nisajja;
570. Ghanatara timiraṃ so iddhiyā saṅgharivā  
Tahimatirava bhīmaṃ ghorasaṃrambhavantam,  
Asani sata nipātaṃ vassadhārā karālaṃ  
Urutara tata meghaṃ māpayī sītavātaṃ;
571. Iti tibhuvanātho dappite nāgasāṅghe  
Vimada karaṇa hetu dassayī bheravānī,  
Atha'pagata pagabbhe te viditvāna satthā  
Apanudi bhayajātaṃ taṅkhaṇaṃyeva tattha;

572. Taruṇa taraṇisobhā ketumālāvilāsiṃ  
Subharuci mukhavandaṃ lakkhaṇākiṇṇagattaṃ,  
Tibhava vibhavadāyiṃ taṃ viditvāna nāgā  
Cutapaharaṇa hatthā vandamānā mahiṃsu;
573. Sirasī nihitapāṇī rattapaṅkeruhehi  
Vikaca vadana nettā'manda kaṅjuppalehi,  
Saka saka dhata nānāvaṇṇa vammādikehi  
Vividha kusumavatthā'manda dīpaddhajehi;
574. Uraga bhavanavāsā nāgakaññā samecca  
Kuca kalasa sahasaṃ dhārayanti salīlaṃ,  
Lalita kaṇaka valli līlamādhatta gattā  
Thuti mukhara mukhā tā sādhu kīlaṃ akaṃsu;
575. Atha muni uragānaṃ viggahaṃ taṃ sametuṃ  
Sutimana kamaṇīyaṃ niccharaṃ brahmaghosaṃ,  
Ajaramamara maggaṃ suppasatthaṃ sudhihi  
Varamati varadhammaṃ desayī naṃ phaṇīnaṃ;
576. Na bho bho saṃsāre khalu bhavati sāraṃ lavampi  
Visesā taṃ sītaṃ jalita dahane vijjati kadā,  
Sadā rāgaṃ rogaṃ byadhata janataṃ nekaduritaṃ  
Tathāpā'yuṃ pāto ravirabhimukhussāva sadisaṃ;
577. Sarīro'yam battiṃsa vidha kuṇapo sāra rahito  
Parittaṃ yobbaññaṃ kusuma sadisaṃ niggatasiri,  
Pahantvā gantabbaṃ bhavaja vibhavaṃ sambhatamidaṃ  
Athevaṃ sante bho varayati bhavaṃ ko nu hi budho;
578. Palāsī makkhī kodhūpaha mato mānavibhavo  
Jano'tīto'to bho payati narakam dāruṇataraṃ,  
Phaṇī majjāro sā guhaka kapayo bhūya bahuso  
Vadhentaññoññaṃ te nanubhavamidaṃ dukkhama'nisaṃ;
579. Pure kāko'lukā atha vanabhavā phandana isā  
Karitvā'tthāne'ghaṃ ciramanubhavaṃ dukkhamanisaṃ,  
Aho kappatthantaṃ saratha duritaṃ verajamidaṃ  
Na hetthassādo bho'ṇumapī kalahe mettima'mataṃ;
580. Balaṃ bālānaṃ bho saka saka vadhāyeva bhavati  
Atītekā khuddā laṭukikadijā natthatanayā,  
Gajaṃ balaṃ mattaṃ pavidhi na balaṃ hoti saraṇaṃ  
Atha'tthāne kiṃ bho kurutha vīriyaṃ bhuti hananaṃ;
581. Na dukkhaṃ tesam ye vigata kalahā ekamanasā  
Atīte bho lāpā aghaṭita mānā peyyavacanā,  
Sukhaṃ vāsaṃ'kāsuṃ yadahani bhavaṃ te'tha vidhurā  
Vasaṃ vyādhasāguṃ tadahani aho!Medhaga balaṃ;
582. Iti tikhiṇa sudhimā kattumete samagge  
Avadi pavara dhammaṃ sādhu viññuppasatthaṃ,  
Atha muditamanā te piṇitā tassa nāgā  
Maṇimayama'tulaṃ taṃ āsanaṃ pūjayiṃsu;

583. Atha muni gaganamboruyha bhumippadesam  
Taruṇa raviva tasmim āsane āsi bhāsam,  
Atha bhujagagaṇā te dibba khajjādikehi  
Parivisiya munindaṃ sādhu dhammaṃ suṇimṣu;
584. Atha jala thalajānaṃ tattha yuddhā'gatānaṃ  
Agaṇita bhūjagānaṃ'sītikoṭī bhujāṅgā,  
Vimala saraṇasīle suppatitṭhā sutuṭṭhā  
Akaru'matimuḷāraṃ satthu pūjāvidhānaṃ;
585. Atha mahudara raṅgño mātulo nāgarājā  
Maninayanakanāmo rammakalyāṇadesā,  
Uruga samara hetū āgato nāgadīpaṃ  
Sugatavara sarīraṃ disva natvālopevaṃ;
586. Yadi sugata! Imaṃ tvaṃ nāgato assa ṭhānaṃ  
Mayamapagata pāṇā homa jhatvā'ññamaññaṃ,  
Rudhiravaha vikiṇṇo assa bhumippadeso  
Pasami dahana dittaṃ ambudeneva taṃ tvaṃ;
587. Mama bhagava! Purāme diṭṭhapubbaṃ tavetaṃ  
Rucira sirisarīraṃ raṃsijālā'bhikiṇṇaṃ,  
Api sumadhura dhammaṃ desayante surānaṃ  
Dasabala sutapubbaṃ ānubhāvañca tuyhaṃ;
588. Ahamasama pure te vissutoyeva dāso  
Yadi manasi dayā te hoti dāse punā'pi,  
Pavara ratanadīpe hoti kalyāṇigaṅgā  
Mama vasati tahiṃ taṃ daṭṭhukāmo'bhiyāce;
589. Iti yatipati tassā'rādhanāṃ paggahetvā  
Saka paricita bhūmyā cetiyatthaṃ vidhāya,  
Maṇimaya paribhuttaṃ āsanaṃ cā'pi tesam  
Sa sumana taru rājaṃ pūjanatthaṃ vidhāya;
590. Dasabala paribhuttaṃ sabbametaṃ bhujāṅgā  
Maṇiriva rucīdaṃ te dhātuyoyeva tasmā,  
Mahatha namatha niccaṃ maṃva saggā'pavaggaṃ  
Dadati iti ca vatvā ovaditvāna satthā;
591. Nabhatala'mu'pagantvā devanāge mahente  
Disi disi visaranto nīlapītādi raṃsi,  
Mana nayana haranto jantunaṃ lokasāro  
Agami ravi'va khamhā jetanāmaṃ vihāraṃ;
592. Atha manujamarānaṃ nattasiddhādikānaṃ  
Satata'mamata dhammaṃ desayanto phaṇīnaṃ,  
Vanabhavana suramme maṅkulavhe nagine  
Akari muni nivāsaṃ chaṭṭhame hāyanamhi;
593. Surapurupavane'tho pārijātassa mūle  
Aruṇa mudusilāyaṃ bhāsamāno munindo  
Sunipuṇa'mabhidhammaṃ desayanto surānaṃ  
Akari varanivāsaṃ sattame tattha vasse;



594. Atha sukhada munindo jetanāme vihāre  
 Avasi vimalapañño aṭṭhame sāradasmiṃ,  
 Ajara'mamara santiṃ phasamāno paresaṃ  
 Vividha naya vicittaṃ desanaṃ desayanto;

Iti laṅkāya dutiyāgamaṇaṃ.

595. Evaṃ jino jetavane vasanto  
 Nissāya sāvaththipuraṃ vihāsi,  
 Sā kidisī āsi purī tadānī  
 Taṃ kīdisaṃ jetavanaṃ vihāraṃ;

596. Bhūmaṅganāyāhita uttamaṅge  
 Bhāsanta nānāratanaḅhirāmā,  
 Visālamolīva visālabhogā  
 Sā jambudīpamhī babhuva rammā;

597. Sirīnikete sirimāvahantī  
 Virājate yā vasudhā talasmiṃ,  
 Sā devarājassa'marāvati' va  
 Rañño kuverassa'lakāva rammā;

598. Sā puñṇapañṇālu janādhivutthā  
 Soṇṇādi puṇṇāpanākiṇṇavīthī,  
 Uttuṅga mātāṅga turaṅga raṅgā  
 Sā rājate kañcana mandirālī;

599. Rarāja sā bhāsura rājaputtā  
 Puñṇaṅganālāsa vilāsayantī,  
 Vedaṅgapāraṅgata vippacārā  
 Dvipaṅca saddehi ca niccaghosā;

600. Anekasippī sata sampakiṇṇā  
 Nānādisāhā'gata satthavāhā,  
 Pahutakhīṇāsavapādapūtā  
 Babhāsa sā maṅgala mandiraṃ'va;

601. Bhavantare yo cariyaṃ caranto  
 Suvo'panissāya vasaṃ guṇena,  
 Yañṇaṅgasākhiṃ matasīnapattaṃ  
 Akā samiddhaṃ phalapallavehi;

602. Idāni patvāna bhavassa antaṃ  
 Nissāya yaṃ so vasate munindo,  
 Tassā guṇaṃ ko hi asesayitvā  
 Katheti sā vassū'pamāya tassā;

603. Tassopakaṭṭhe ratanaṃva'nagghaṃ  
 Manoharo uttamasattasevi,  
 Janānamākakhiṇatado vihāro  
 Babhuva jetādi vanavhayena;

604. Samaphulla puppharasa modita chappadālī  
 Jhaṅkāra nāda parivādita tantinādā,  
 Sammatta'nanta dija kujita gītavantā

Tiṭṭhanti yattha taravo naṭakāva chekā;

605. Khīraṇṇavāhariya dhoviya khīranīrā  
Sosetva sajjhumalaye sasikanti massam  
Yatthokiritva tanitā viya vālukāyo  
Sā mālakāvali babhāsa payodadhi'va;
606. Vijjotamāna ratanappamukhānanamhi  
Sopāna māla padagaṇṭhidujehi hāsam,  
Katveva devabhavanānamahaṃ virāga  
Vantī'ti gandhakuṭi yattha pahāsayingittha;
607. Kammāra gaggari mukho'pari sampapuṇṇā  
Aṅgāra kantara viniggata jālakāva,  
Sambuddhadeha pariniggata raṃsimālā  
Dāyagga niggata karā visaranti yasmim;
608. Tumhe sarāga janasaṅgamato'ti gītā  
Dhaññā mayantī vimalehī samaṅgitattā,  
Tuṭṭhāva hāsa makarā surapādapaṇaṃ  
Rājenti yattha yatinissita pādapindā;
609. Punnāga nīpa vakula'jjuna rājarukkha  
Nāgā'ga cūta yugapattaka campakānaṃ,  
Pupphābhikiṇṇa dharaṇī ratanehi nānā  
Pacchanna dibbabhavanaṃ viya bhāti yattha;
610. Brahmāsurasura naroraga liṅgisiddha  
Vijjādharādi janatā katavandanehi,  
Teheva ghuṭṭha thutimaṅgala gītikāhi  
Yatthopagāna mananettagaṇā mudenti;
611. Nigghositāmala susītala nijjharehi  
Sammatta nekadija ghuṭṭha jalāsayehe,  
Kiṅjakka patta parikiṇṇa silātalehi  
Tussanti yattha satataṃ yatīnaṃ manāti;
612. Yo neka kappa sata sañcita puññarāsi  
Hitvā'mitaṃ kapilavatthu mahāsirimpi,  
Āgamma yattha nīrato sugato mahesi  
Ko tattha bhuti matulaṃ kathiko katheti;
613. Tasmim jino vasati jetavane vihāre  
Indo yathā rucira nandana kānanamhi,  
Brahmā'va brahmabhavane sapitāmahehi  
Tārāvalī parivuto gagane'va vando;
614. Tadāgamma mahānāgo maṇi akkhikanāmakko,  
Laṅkāto jinapādasim phañim pacceda'mabruvi;
615. Sambuddhā dhīra lokasim lokassatthābhivuddhiyā,  
Jāyanti sāmi tumhākaṃ dayāyanto'gadhā mayaṃ;
616. Tena me dāsabhutassa saṃsārandugharā thirā,  
Muttim yadicchase mayhaṃ gahaṇīyaṃ nimantaṇaṃ;

617. Sutvāna taṃ mahānāgo mahānāga nimantaṇaṃ,  
Paṭiggahesi taṃ tuṅhībhāvena karuṇāya so;
618. Ñatvā taṃ sumano nāgo lahumāgamma sīhalaṃ,  
Kaḷyāṇāpagapassamhi manonandana bhutale;
619. Sajjhu kambumaṇi mutta pavāla vajirāmaye,  
Vahārahe mahāthūne ghaṭakādiṃ nidhāpiya;
620. Datvā tulādayo sesa mandiraṅge tatheva ca,  
Viṭaṅka vyāla sīhādi pantiyo'pi tathevahi;
621. Sātakumhamayā'neka cittehi sādhu cittitaṃ,  
Nimmāya gopānasiyo pakkhapāse ca kaṇṇikaṃ;
622. Siṅgi nikkhena siṅgaṅca chadanindamaṇīhi ca,  
Soṇṇa kiṅkiṇi mālāyo kaṇṇamālā ca māpiya;
623. Cittavitānaṃ bandhitvā muttolambe tahiṃ tahiṃ,  
Katvāna gandhadāmehi pupphadāmehi saṅkulam;
624. Indanīlamayaṃ bhumi majjhe'naggha mahāsaṇaṃ,  
Māpesi parito sesa bhikkhūnaṅca subhāsane;
625. Ratanehe'vāpassaye vedikā eḷikāmaye,  
Muttā vāluka saṅkiṇṇaṃ mālakaṅca manoramam;
626. Satta ratana sambhuta toraṇū'pari toraṇe,  
Santīra kusumā'kiṇṇa hāṭakādi ghaṭākulam;
627. Neka rāgaddhajākiṇṇa vitāna samalaṅkataṃ,  
Dīpa dhūpāli saṅkiṇṇa gandhapuppha samākulam;
628. Evamādihi nekehi vaṇṇehi samalaṅkataṃ,  
Māpetvā maṇḍapaṃ seṭṭhaṃ devamaṇḍapa santibham;
629. Sīta vāluka saṅchannaṃ mudu pādapaṭatthataṃ,  
Māpetvevaṃ mahāmaggaṃ suraṅjasa samaṅjasam;
630. Saṅcinitvāna te nāgā khajja bhojja phalāphale,  
Dibbannaṃ pacure paṭimaggam gamum tadā;
631. Tato kāruṇiko nātho bodhito aṭṭhame same,  
Vesākha puṇṇamāsīmhi sannipātiya sāvake;
632. Ethajja bhikkhavo laṅkaṃ nāgānaṃ'nuggahāya bho,  
Maṇiakkhiko nimantesi pasanno buddhasāsane;
633. Sutvāna vacanaṃ tassa sambuddhassa sirīmato,  
Assavā pesalā bhikkhū paccassosum samāhitā;
634. Sāriputto tato thero paññāya'gga dhurandharo,  
Pattacīvaramā'dāya agamā jinu'pantikaṃ;
635. Moggallāno mahāthero dutiyo aggasāvako,  
Pattacīvaramādāya sopāga jina santikaṃ;

636. Dhūtapāpo dhutaṅgaggo mahākassapa nāmako,  
Pattacīvaramādāya āgamā jinasantikam;
637. Sāsane vinayañña namaggo' pālivhayo yata,  
Pattacīvaramādāya jinantikamu'pāgami;
638. Dibbacakkhūnamaggo yo ruddhapāpāri dappako,  
Thero'nuruddho varado sopāga munisantikam;
639. Mañiva kāmado kāmamu'pavāno'ti vissuto,  
Ñāṇī gaṇī dakkhiṇeyyo theropāga jinantikam;
640. Bakkulo vimalo sīla samādhādi guṇākaro,  
Āgato saporikkhāro bhikkhūnam samitiṃ tadā;
641. Buddhasāsana dhorayho thero āṅgulimālako,  
Sahā'gantum munindena sannaddho sahasā gato;
642. Sāsanodaya selagge sūriyo viya bhāti yo,  
So'yaṃ rāhulathero'pi lahu'gā pitu santikam;
643. Bhaddācāro bhaddiyavho thero bhaddaghaṭo viya,  
Pākaṭo bhuvane so'pi gato sambuddha santikam;
644. Devaddumo'va lokassa yo dadāti'cchiti'cchitam,  
Jinorasopi selavho gato sambuddhasantikam;
645. Yāminī sāmiko'vāti bhāti yo sāsānambare,  
Mahānāma mahāthero sopāga munisantikam;
646. Manosilātalaggamhi jumhamāno'va kesarī,  
Subhutiṃ mahāthero buddhupantika māgato;
647. Buddhasāsana chaddanta sarasī sāraso viya,  
Vissuto tissathero'pi gato bhikkhusamāgamaṃ;
648. Jinasāsana samphullasarasīruha majjhago,  
Madhubbata nibho rādhathe'pi sahasā gato;
649. Bhagu dabbopa'seno ca koṇḍañña'ssaji sīvali,  
Ete jinatrajā therā gatāsum munisantikam;
650. Kumārakassapo puṇṇosoṇosobhita revatā,  
Therāpete abhiññātā gatāsum satthusantikam;
651. Vaṅgīso sāgato nando bhāradvājo gavampati,  
Pattacīvaramādāya gatāsum jinasantikam;
652. Evamādi mahānāgā pañcasata jinorasā,  
Samāgañchum saḥāgantum muninā lokasāminam;
653. Tato so jagadānando karuṇāyābhirādhito,  
Merum parikkhipantova anekajjuti vijjuyā;
654. Nivāsetvā suddharamsi visarantaravāsakam,  
Tassūpari jino rattaṃ bandhitvā kāyabandham;

655. Accuggataṃ mahāthūpaṃ cāru cāmīkarajjutim,  
Paṭicchādayamānova rattakambala kañcunā;
656. Vaṇṇa nigrodhapakkaṃva surattaṃ paṃsukulikaṃ,  
Saṅghāṭiyā karitvāna sagaṇaṃ uttarīyakaṃ;
657. Hutvāna supaṭicchanto pārupitvāna sādhukaṃ,  
Pattatthāya pasāresi jālākulakarañjino;
658. Lokanāthappabhāvena tato pattamadhubbato,  
Pāṇi saroruhassanto sampattosi tamaggahi;
659. Tato sasissako nātho uggantvā gaganāṅganaṃ,  
Nānāvaṇṇambude tattha maddanto gantumārahābhi;
660. Tato sambuddha dehasmā nikkhantāsuṃ cha raṃsiyo,  
Hemakaṇṇikato yāta maṇigopānasī yathā;
661. Bāṇindīvara pupphehi meva'kindamaṇihi ca,  
Chādentī viya nakkhattā nīlaṃ'su munidehato;
662. Campakuddālamālābhī hemacuṇṇambarehi ca,  
Pūrayanti viyāsaṅga pītaṃsū jinadehato;
663. Bhaṇḍīpupphakadambehi lohitaṅkamaṇihi ca,  
Lohitābhā papūrenti disā'gā munidehato;
664. Hāra mallika mālāhi somaṃsu phalikādīhi,  
Pūrayanti viyāsaṅga odātā munidehato;
665. Piṇjumañjeṭṭharāsīhi padumābhamaṇihi ca,  
Disaṃ chādayamānāgā maṇjiṭṭhābhā jinaṅgato;
666. Nekindacāpa kiṇṇaṃva divasaṃ ratanutthataṃ,  
Cittapaṇaṃva muñcantaṃ missābhāgā jinaṅgato;
667. Girikūṭa kūṭāgāra mattā chabbaṇṇa raṃsiyo,  
Āvelavelā dhāvanti dippamānetaretarā;
668. Gacchamānā'hanitvāna cakkavāḷa siluccaye,  
Uggantvā parato yantī nīra nijjhara sannībhā;
669. Sammukhe sammukhe tāyo rukkhapabbata ādayo,  
Kārayantā sakaṃ vaṇṇaṃ dhāvanta'pi ca sindhavo;
670. Uddhamuggataraṃsīhi rañjitā jaladā tadā,  
Nānāvaṇṇe punevāsi nūtaṇo ravimaṇḍalo;
671. Jinappahā pavāhesu nimuggā devatā gatā,  
Pūjetuṃva nijattehi nānāvaṇṇā siyuṃ tadā;
672. Paviṭṭhā buddharaṃsīnamantaraṃ devadhītaṃ,  
Asañjānīya muyhiṃsu muhuttaṃ attano dhavaṃ;
673. Surā suroraga brahma siddha vijjādhārādayo,  
Cāmaracchattaketuhi pūjayantā jinantvaguṃ;

674. Agghikaṃ pantiyo keci toraṇūpari toraṇe,  
Ghaṭadīpāliyo tantha karonti abhito'bhito;
675. Pādapaṭe pattharanti vitatvanti vitānake,  
Tatthūpari anekānī kusumāno'kiranti ca;
676. Katamaṃ devalokannuyāti lokaggaṇāyako,  
Yāti kiṃ buhmalokannu amhākaṃ bhavanannu kho;
677. Kattha nu kho devadevo kassanuggahabuddhīyā,  
Yāti' ti kaṅkhitā keci saṃsaranti itocito;
678. Māpetvā abhito magge maṇḍape ratanāmaye,  
Sayanāsaṇaṃ paññāpetvā kāci tiṭṭhanti devatā;
679. Tahim̐ tahim̐ paṭṭhapentā sudhanta madhurodakaṃ,  
Yāvamānā jinaṃ keci tiṭṭhanti ca mahanti ca;
680. Evaṃ mahāmahe nātho vattamāne anūpame,  
Jalaṃ sambuddhasiriyā nūtaṇo sūriyo viya;
681. Brahmaṣeṇābhito yāna brahmāvātha sahaṃpati,  
Surasenābhito yāna sakkova samalaṅkato;
682. Gagālimabhito yāna gahaṅgā maṇi sannibho,  
Dhataṛaṭṭhakhagindova haṃsasenaṇi pubbago;
683. Apeta rāgadosehi vītaṃhehi sabbaso,  
Paṭisaṃbhidatta sampatta sāvakehi anuggato;
684. Yesaṃ yesaṃ manasmiṃ yaṃ yamatthi kiṅci saṃsayāṃ,  
Tesaṃ taṃ taṃ paṇudento desanāya sudhāsinaṃ;
685. Tattha tatthānurūpena pāṭihāriya kambunā,  
Lokassa nayanāṇi so tosassusu nimujjayaṃ;
686. Sampatto'laṅkataṃ laṅkamathāgu phaṇino tadā,  
Paṭimaggāṃ karontā te tattha tattha mahāmaṃ;
687. Uragānamantare devā brahmāsuṃ tesamantare,  
Evaṃ sammissako loke brahmalokā papūrayi;
688. Ye passanti jinaṃ tattha sasissaṃ siriyā jalaṃ,  
Suladdhā tehi nettāni tesamakkhīni locanā;
689. Ye suṇanti tadā dhammaṃ dhammissara pabhāvitaṃ,  
Suladdhā tehi sotāni tesāṃ sotāni sotakā;
690. Ye lapanti tadā buddhaguṇaṇhi guṇabhūsaṇā,  
Suladdhā tehi ve jivhā tesāṃ jivhā rasaṇṇakā;
691. Ye vandanti jinaṃ yantaṃ sasaṅghaṃ gaganāṅgane,  
Suladdhā tehi hatthāni tesāṃyeva bhujā bhujā;
692. Tadā tathāgataṃ disvā ye santuṭṭhā tathāgataṃ,  
Tathāgataṇaṃ sabbesaṃ yo toso hotu sabbadā;

693. Gato kalyāṇīyaṃ nātho mahentevaṃ sadevake,  
Tesam pūjāvidhānaṃ ko mukhenekena bhāsati;
694. Tato gaṅgā manuññañhi sampattaṃ taṃ saputtakaṃ,  
Taraṅga mudu bāhāhi gahetvā caraṇambuḷe;
695. Pāde pakkhālayi sammā pheṇa pupphupahārikā,  
Tato tatotuṃ gaṇhitvā akā dehassanuggahaṃ;
696. Tato so yācito satthā nāgasāṅghehi vandiya,  
Agamā maṇḍapaṃ rammaṃ manonandanamāvahaṃ;
697. Gantvā maṇḍapa majjhamhi buddhāraha mahāsane,  
Nisīdobbhāsayaṃ āsā ravīva udayāvale;
698. Tato bhikkhu nisīdiṃsu patta pattāsane tadā,  
Babhāsa maṇḍapaṃ'tīva saraṃva padumākulaṃ;
699. Jananettālino'gamma vasī sommamukhambuḷe,  
Patantā kusalāmode gaṇhantā tittino gatā;
700. Tathā sabhikkhukā nāgā munino rūpasāgare,  
Nettinda maṇināvāhi pāraṃ gantuṃ na te pabhu;
701. Tato sasaṅghaṃ sugataṃ sajana maṇi akkhiko,  
Sakkaccaṃ sakahatthehi annapānena tappayī;
702. Athonīta pattapāṇima'ccayitvā tathāgataṃ,  
Bhattinno nimantesi desanatthānumodanaṃ;
703. Tato brahmassaro satthā niccharaṃ brahmaghosanaṃ,  
Viññāpento jane sabbe sakasaddena desanaṃ;
704. Desesvevaṃ jino dhamma'manilāsanakādināṃ,  
Pītipāmojja jananaṃ nibbāṇāmata'māvahaṃ;
705. Bho bho suṇātha bhujagā bhavasāgaramhi  
Pāpārinakkamakarākula duggamamhi,  
Maggā janā khalu labhanti kadā patiṭṭhaṃ,  
Ohāya buddhathirasāratarim visālaṃ;
706. Laddhāna dullabhataraṃ munipātubhūta  
Kālaṃ cirena bhujagā na pamādayittha,  
Jātī jarā maraṇa dukkha pariddavā ca  
Saṃsārikassa na tatopa'gatassa hoti;
707. Tāruññamambujasirimva parittakālaṃ  
Pāṇaṃ tusāralava'sārataraṃ janānaṃ,  
Bhogaṃ dadhāti jaladhimi taraṅgabhaṅgiṃ  
Niccaṃ mano dahati sokasikhībhi nānā;
708. Katvāna rāgamisayo'pi khagā dupaṇṇā  
Thirūpi nārikusumesupi rūpagiddhā,  
Pattā'nayaṃ khalu pure parihīna jhānā  
Rūpe na rajjatha tato khalu sādhuḷaṇṇā;

709. Saddānurāgamanugopi pure sikhāṇḍī  
Sutvāna mori madhuraṃ giramañjitaṅgo,  
Vyādhassa hatthamagamāsi bhavesu tasmā  
Nattheva saddasamadukkhakaraṃ janānaṃ;
710. Ohāya nekakusumesu parāgarāgaṃ  
Mattebhakumbha magamā madagandhaluddho,  
Bhīṅgo pabhagga tanuko karikaṇṇatālā  
Nattheva gandhasadisam tihavesu pāsam;
711. Gambhīra nīradhibhavo pavurāsano'pi  
Miccho gilitva balisaṃ rasagedhahetu,  
Pappoti dukkhamatulaṃ na rasesu sāta  
Matthiti mantva pajabhātha rasesu gedham;
712. Bho buhmalokā'gata suddhasatto  
Buddhattameva niyato api bodhisatto,  
Thisaṅgamāya parihāyi sarajjato'pi  
Tasmā hi phassasadiso anayo navatthi;
713. Bheraṇḍa pelaka kapu'ddaka hetuhīna  
Sattāpi dānaruci dānamaṇippabhāvā,  
Pattā'pavagga varasārapuraṃ bhujāṅgā  
Ko nappadāti dhaniko siva'mesamāno;
714. Pāletva sīlama'malaṃ visakaṇṭhikāpi  
Indassa nandanavane'si piyā mahesī,  
Tasmā pasatthavibhavaṃ yadi patthayavho  
Pāletha sīlama'malaṃ khalu jivitaṃ'va;
715. Saggo visāla ratanālaya sampakiṇṇo  
Sānanda'manda surasundari sundaro so,  
Phullambujākara vanādihi nandanīyo  
Tatthāmarā viya'marā'virataṃ ramanti;
716. Tamhāpi bho rucira brahmanikāya bhuti  
Rammā tatopi mahitaṃ amataṃ variṭṭham,  
Tasmāttakāma niratā janatā sapaññā  
Taṇhakkhayāya satataṃ vīriyaṃ karotha;
717. Evaṃ saddhammamaggaṃ varamati sugato desayi pannagānaṃ  
Sutvā te sampahaṭṭhā mahamahakaraṃ nijjarādīhi saddhim,  
Tesaṃ ve desanāyaṃ suraviṭṭapi samā sātthikā tattha jātā  
So nātho taṅca dhammaṃ bhagavati tanayā te ca vo pālayantu

Kalyāṇi desāgamaṃ.

718. Nagādhirāje sumanābhidhāne  
Vasaṃ sumedho sumanābhidhāno,  
Devo tadā'gamma sapārisajjo  
Kalyāṇiyaṃ tattha phaṇīhi saddhim;
719. Datvā'pavaggassa nidānadānaṃ  
Sutvāna dhammaṃ sutisītibhutaṃ,  
Pahaṭṭhacitto upagamma buddham



Natvāha evaṃ katapañjaliko;

720. Na ve phaṇīnaṃ napi mānūsānaṃ  
Nānimmisānaṃ na pitāmahānaṃ,  
Hitattha mevākhila lokanāthā  
Jāyantī loke karuṇāguṇaggā;
721. Antogadhā nūna mayampi tuyhaṃ  
Dayāya tasmā phaṇīnaṃ vimesaṃ,  
Karoḥi mayhaṃ bhavanamhi dhīra  
Pādaṃ sunā'tīva pavittarūpaṃ;
722. Yo'yaṃ nago dissati'to purattha  
Bhumaṅgaṇā molisirim vahanto,  
Samantakūṭoti samantacakkhu  
Jānāti loko vasatiṃ mametaṃ;
723. Yo nīla nānā vanarāji rājito  
Āsāra dhārā giri nijjharākulo,  
Āpīta nīlāruṇa pallavāvalī  
Jīmūtakūṭo viya bhāti uggato;
724. Yo sindhuvāriṃ urasā pabhejja  
Āgamma te pādapaṇāma hetu,  
Vijjotamāno viyacakkapāṇi  
Mahāti tuṅgagga dharādharindo;
725. Gaṅgāvadhū kuṭakirīṭadhārī  
Sāmanta selinda camūpatīko,  
Yo'yaṃ dharādharā mahāmahīpo  
Ra rāja laṅkā nagaraṅgaṇamhi;
726. Pāroha danto citakūṭa kumbho  
Aneka soṇḍikkha savanti hattho,  
Yo nijjharāsāra madappavāho  
Gajorivā'bhāti surādhipassa;
727. Samphūlla pupphatthabakā'napattā  
Satdhatta rattaṅkuramolimālā,  
Kantālatā'liṅgita khandhadehā  
Tiṭṭhanti bhūpāva yaḥim kujindā;
728. Siddhaṅgaṇā rattapadambujālī  
Samhinna hatthābharaṇālī yuttā,  
Kekīkalāpuppala mālamālī  
Silātalākañja nibhanti yattha;
729. Maṅgura pāṭhīna savāṅka siṅgu  
Rohicca muñjā'Mara pāvusehi,  
Kulīranakkāda'nimesakehi  
Nikīlītaṃ daddara rattapehi;
730. Niccañhi saṃrāva virācitānaṃ  
Balāka kādamba kadambakānaṃ,  
Āpānasālā viya sārasānaṃ

Haṃsāliṇaṃ maṅgala vāsabhūtaṃ;

731. Nirantarāmoda mudāvagehi  
Suphulla kokāsa' ravindakehi,  
Sogandhi' kindīvara keravehi  
Kiñjakkha channaṇṇatalehi cittaṃ;
732. Sītaccha sātodaka sampapuṇṇa  
Sarojinī laṅkata bhumibhāgo,  
Yo'yaṃ pure bhāti manuññarūpo  
Samantakūṭo sa samantakūṭo;
733. Dalita vipinasaṇḍā yattha sele samantā  
Samupagata janānaṃ cittaṃāmodayanti,  
Madhuka vaṭa kareri bodhi jambīra bhalli  
Khadira' bhaya kadambā phulla sellū palāsā;
734. Paṇasa' mata pilakkhā kaṇhavaṇṭa'kkha ciñcā  
Labuja badari nīpā phandani' ndīvarāva  
Makula' sana piyālā gaddabhaṇḍa'jjunā ca  
Kamuka salla tindu' dumbarambassa'kaṇṇā;
735. Punnāga campaka dumuppala dāḍimā ca  
Khajjūri tāla girimallika' soka tālā,  
Hintāla nāga nivulā yugapatta' riṭṭha  
Setamba eravatakāpi ca ketakā ca
736. Samaphullabhaṇḍi sumana'jjaka yūthikā ca  
Vāsanti cittaka japā ravimālati ca,  
Kundassa' māraka kuraṇḍaka bījapūra  
Sephālikā ca tiṇasūla samīraṇā ca;
737. Vocu'cju kīcaka haliddi viḷaṅgi bimbi  
Nīlī vacā' tivisālābu ca nāgavallī,  
Vallīha sārada' parājitavāru' sīrā  
Phalādi neka vanarāji virājito so;
738. Tiṭṭhanti keci taravo surabhiṃ kirantā  
Tattheva keci phalitā madhurapphalāni,  
Andolitā phalitapallavitā latāyo  
Sandhārayaṃ viṭapa jattusu bhanti keci;
739. Sāmantage janagaṇe satataṃ dumindā  
Sampīṇayanti dalitā phalino ca yasmīṃ,  
Te avhayanti viya locana gocarehi  
Vāte' ritehi taruṇāruṇa pallavehi;
740. Tasmīṃ vane vanasurā nijavasundarīhi  
Ramme silātaladahe sikatātale ca,  
Naccanti tanti turīyāni ca vādayanti  
Gāyanti mālabharino satataṃ patītā;
741. Siddhā ca siddhavanitā hi tahiṃ tahiṃ te  
Dibbanti pupphaphala pattarasāhinandi,  
Acchanti tattha giripādapa rāmaṇeyye

Yogehi saṅgata manā bahitāpasāpi;

742. Tasmim vane hariṇa rohita puṇḍarīka  
Gokaṇṇa salla sasa jambuka sūkarā ca,  
Sākhāmige'ṇivaga babbu rurū kuruṅga  
Godhā'khu pampaka kapī gavayā ca'nekā;
743. Te vagga vagga carino hayamārakādī  
Nānā catuppadagaṇā muditā vasanti,  
Pakkhīpi kosiya kapotaka nīlagīva  
Dhaṅkā'ta lāpa parapuṭṭha madhubbatāva;
744. Nijjivha dindiha cakoraka sālīkā ca  
Cakkavha kīra kurarā kulalā ca kaṅkā,  
Citracchadā madhura kūjaka nekapakkhī  
Saṅgama yattha nivasanti manuññarūpā;
745. Tesam vanantamatha nāṭakamaṇḍalā'ca  
Gītālayam viya ahosi ca gāyakānam,  
Āpānabhumi sadisaṃ migapakkhikānam  
Niccussavam ratikaram nayanābhirāmaṃ;
746. Evaṃ vidho vipinarāji virājitehi  
Kūṭehi nekasura sundari maṇḍitehi,  
Atyucca nīlasikhigīva samāna vaṇṇo  
Eso samantagiri me vasatī muninda;
747. Evaṃ patīta manaso sumanābhīdhāno  
Vatvāna natvamasamaṃ gamanopayuttaṃ,  
Kāsātha sopi muni tassa vacaṃ paṭicca  
Sabbhikkhu nikkhami jino gaganāyanamhi;
748. Niccetanāpi giripādapa ādayopi  
Nāgā supaṇṇa miga pakkhika hetukāpi,  
Vijjādharāmarā'surā caturāṇanāpi  
Saṅgama'kaṃsu sumanā mahamabbhutaṃ te;
749. Muninde payante samiddham tilokaṃ  
Girindābhinandā dumindā pabuddhā,  
Migindā sutuṭṭhā khagindā sughuṭṭhā  
Pavuṭṭho mahindo paṇaṭṭho nidāgho;
750. Gacchante gaganāyanena sugate bhānu'si santo tadā  
Vāresuṃ sūriyātaṇṇa jaladā siṅgiṃsu bhūmyā jalaṃ,  
Mandāmanda sugandha muddha pavano pāpeti sitaṃ sukhaṃ,  
Devādi dhaja chatta cāmarakarā pūjenti mānenti ca;
751. Sannīra hintāla'ga sindi pūga  
Tāmbasālādi mahīruhitdā,  
Tiṭṭhanti te cāmarahatthakā'va  
Pupphehi channo gaganāṅganopi;
752. Anena vidhinā jagadeka nātho  
Pavattamānesu mahāmāhesu,  
Disaṅca vidisaṃ paripūrayanto

Jabbaṇṇaramsīhi agā nagindaṃ;

753. Tasmim samantanagamuddhani lokanātho  
Chabbaṇṇaramsi nikaraṃ disi pattharanto,  
Bhikkhūhi so parivuto parasāgarantaṃ  
Olokayaṃ t̥hitimakāsi aanomavaṇṇo;
754. Laṅkāvadhū sumanakūṭa kirīṭa kūṭaṃ  
Sajjesi'naggha jana rāja maṇī mahanto,  
Icchatthadaṃ sivadamaṇṇaṃ tiloke  
Taṃ'dāni bho bhajatha sevatha sabbakālaṃ;
755. Kāsuṃ tadā suravarā surasundarīhi  
Laṅkāya selasikharesu mahāsamajjaṃ,  
Vajjimsu bheri vikatī sayameva sabbā  
Bhassimsu dibbakusumābharaṇā nabhamhā;
756. Laṅkambaraṃ nikhilamāsi ca chattachattaṃ  
Nānā virāga dhaja ketu samākulañca,  
Nānāsugandha kusumādi disantarālaṃ,  
Nānagghikāvali virājita mantaḷikkhaṃ;
757. Tasmim dine'si ratanaṃ maṇitorañehi  
Dīpāli puṇṇaghaṭapantīhi dassanīyaṃ,  
Sambuddha dehaparitogata chappabhāhi  
Rattaṃ nabhāvani carācara sabbadabbaṃ;
758. Mālāvataṃsa samakā girayo samantā  
Hutvā namanti ca bhamanti sacetanā'va,  
Sabbepi tattha taravoca latādayo ca  
Naccanti dibbanaṭakā viya onataggā;
759. Evaṃ tadā mahata vimhaya pāṭihere  
Buddhānubhāva janite idha vattamāne,  
Tatvāna dhīracaraṇaṃ samano sudhāsī  
Evaṃ vadī parama pitimano udaggo;
760. Ye te mudu komala rattapādā  
Suratta phullamburuhopamānā,  
Vaṭṭānupubbāyata aṅgulikā  
Sutambatuṅgagga nakhāvalikā;
761. Suvaṇṇakummu'nata pādapiṭṭhi  
Nigulha goppāyata paṇhibhāgā  
Samacchamāyaṃ sakalaṃ patitṭhitā  
Na limpate succhavitā rajādi;
762. Sammatta hatthosabha haṃsa sīha  
Samāna līlāya yahim payāti,  
Ninnunnatā bheritalā'va bhumi  
Hotātha pupphādi sumaṇḍitā ca;
763. Apenti maggā sayameva khāṇu  
Sakaṇṭamūlā kaṭṭhalā ca sabbe,  
Gambhīra nīrāpaga paṅkaduggā

Hitvā sabhāvaṃ ramaṇīyamenti;

764. Vajanti bhumiṃ girayo purattha  
Pasārite pādavare jinassa,  
Nibbāti aggī narakodarepi  
Gaṇhanti pāde padumādayo ca;
765. Idañhi te pādātaḷe yatīsa  
Sanābhi nemi ghaṭikāvalīhi,  
Susaṇṭhitam cā'rasahassavantam  
Sandissate cakkavaram mahantam;
766. Tameva cakkam parivārayitvā  
Sirivaccha sovatti'vatamsakā ca,  
Pāsāda bhadrasana puṇṇapāti  
Sītāpattāsī mayūrahathā;
767. Nīlādibhedā kamaluppalā ca  
Sameru sattaddi mahāsamuddā,  
Sattāpagā satta mahāsarā ca  
Himālayo cakkavāḷaddiko ca;
768. Candakkatārā ca chadevalokā  
Pitāmahāvāsa manussalokam,  
Suvaṇṇa nāvā sivikā ca saṅkham  
Kelāsaselaṃ dhajatorañā ca;
769. Cintāmaṇuṇhīsa savaccha dhenū  
Mīnadvayam cakkavatti saseno,  
Sīha'ssa mātaṅga viyaggharājā  
Haṃsosabho kimpuriso mayūro;
770. Koñcā ca erāvaṇa hatthirājā  
Sacakkavākā makarādayo ca,  
Nānā mahāmaṅgala lakkhaṇā te  
Virocamānā vilasanti niccam;
771. Jātakkaṇe yassa mahim pabhejja  
Visāla sattuddaya paṅkajāni,  
Paṭiggahesum caraṇāni yāni  
Te tānimānacchariyāni loke;
772. Vandāpanatthāyu'panītakāle  
Pitūhi te devala tāpasindaṃ,  
Pādāni gantvāna jaṭāsu tassa  
Āsum tave'taṅghiyugaṃ aho bho;
773. Suddhodanavhassa narādhipassa  
Santosa toyehi papūritassa,  
Siro visuddhambu ruhākarassa  
Saroru hāsum caraṇāni tuyham;
774. Ye caṅkame caṅkamaṇāvasāne  
Onamma merūdaya pabbaniṇḍā,  
Paṭiggahesum caraṇāni yāni

Te tānimā'nacchariyāni loke;

775. Yaṃ vandamāno tidivādhipo so  
Yassānubhāvena gatāyukopi,  
Sakiyaṭhāne'sinapunāpi te'vaṃ  
Pādambujaṃ dhīra!Mahānubhāvaṃ;
776. Dehīnamaggopi nisākarāri  
Mānunnato so sayitassa tuyhaṃ,  
Pādassa antampi na sakkhi daṭṭhuṃ  
Acchera rūpaṃ idamaṅghikañjaṃ;
777. Gaṅgāya gaṅgāpati sannidhāne  
Tīre tadā nammada jimhagassa,  
Pādassa lañchaṃ akarī muninda  
Mayhaṃ'pi hotaṃ karuṇā tavesā;
778. Ārādhito saccaka tāpasena  
Akā tuvaṃ saccaka baddhasele,  
Pādassa lañchaṃ jagato hitāya  
Mayhampi hotaṃ tamanuggahante;
779. Sutvāna nātho girametamassa  
Passaṃ mahābhuti'manāgatesu,  
Lokassa lokehi mahīya māno  
Akāsi vāmena padena lañchaṃ;
780. Sambodhito aṭṭhama sāradasmiṃ  
Vesākhamāse muṇi puṇṇamāyaṃ,  
Pādassa'bhiññānamakā'paraṇhe  
Sadevake sassamaṇe mahente;
781. Pataṅkikā sitthaka matthakamhi  
Yathaṅkitā khattiya muddikāya,  
Āseva'mevaṃ jinapādalañchaṃ  
Samantakūṭamhi namassanīyaṃ;
782. Akālamegho ca tato pavassī  
Vassiṃsu nānāratanaṇi khamhā,  
Tathā parito kusumambarāni  
Suvaṇṇacuṇṇāni jinekavaṇṇā;
783. Tato'pagantvā sugatebhagāmī  
Tasmimṃ nitambe girigabbharāyaṃ,  
Divāvihārāya nisīdi yattha  
Supākaṭaṃ taṃ bhagavāguhā'ti;
784. Tatorahantā sugatorasā te  
Gandhādīnā sādhu mahetva sabbe,  
Vanditva katvāna padakkhiṇantaṃ  
Tahaṃ tahaṃ'kaṃsu divāvihāraṃ;
785. Lataṅganāyo viṭapīdhavāna  
Mālamba sākhaṇṭhulāṃ'sapasse,  
Suphulla namañjūkara mañjarīhi

Namassamānā'va sadonataggā;

786. Tiṭṭhanti rukkhā naṭakā'va tattha  
Suphulla sākḥākara'mukkipitvā,  
Namassamānā viya onataggā  
Vattanti mānacchariyāni niccaṃ;
787. Tatheva uccāvaca pabbatā ca  
Namassamānā viya pādalañchaṃ,  
Tiṭṭhanti ninnagga sikhā samantā  
Idampi niccababhutameva tattha;
788. Tasmim nage pādavarāṅkitasmim  
Khalamaṇḍalokāsa padesamatte,  
Samosarante bahuke janepi  
Hoteva okāsama,ho padaṅkaṃ;
789. Samosarivāna mahetva satte  
Nikkhantamatte jaladā samecca,  
Sodhenti māla'mbuvahehi sādhu  
Idampi niccabbhutameva tattha;
790. Pādena phuṭṭhassa silātalassa  
Etādisānacchariyāni honti,  
Lokekanāthassa anāsavassa  
Mahabbhutaṃ konu kathaṃ bhaṇeyya;
791. Divāvihāraṃ bhagavā sasaṅgho  
Katvāna tasmim pana kiṅcikālaṃ,  
Mahīyamānesu sadevakesu  
Tato gato rohaṇamambaramhā;
792. Tasmim sasaṅgho muni dīghavāpiyaṃ  
Thūpassa ṭhāne paramāya bhūmiyā,  
Garuṃ karonto pana taṃ mahītaṃ  
Nirodhabhāvena nisīdi satrajo;
793. Tato'nurādhaṃ bhagavā nabhamhā  
Gantvāna bodhiṭṭhitabhūmiyā ca,  
Ṭhāne mahāmaṅgalacetiyassa  
Tatheva akkhantinahitassa ṭhāne;
794. Nisīdi patvāna nirādhapītiṃ  
Sasāvako pekkhama'nāgataddhaṃ,  
Patiṭṭhitā me pana bodhidhātu  
Karonti loke'ti janassa vuddhiṃ;
795. Vuṭṭhāya tuṭṭho bhagavā nirodhā  
Gato silāthūpavarassa ṭhānaṃ,  
Ṭhito taḥim dhammamathuddisitvā  
Gato nabhā jetavanaṃ surammaṃ;
796. Evaṃ so dhammarājā janahitavihito vīta dosārivaggo  
Laṅkāramāya ramme sumanagirisire'kāsi yaṃ pādalañchaṃ  
Taṃ vo saggā'pavaggaṃ dadati munisamaṃ citta matte pasanne

Tasmā bho!Bho! Pahaṭṭhā namatha mahatha taṃ sādhu sādhuḥpasattham;

Iti samantakūṭa vaṇṇanā niṭṭhitā.

Grantha samāptiya.

1. Anantarā samattāyaṃ sumañaddisu vaṇṇanā,  
Tatheva sādhu saṅakappā khippaṃ pappontu pāṇinaṃ;
2. Yo yācito'raññavāsī guṇādhāra sudhīmatā,  
Rāhulatheranāmena vissutena mahītale;
3. Bhuvanodaramhi paññāto ravīvambara maṇḍale,  
Araññaratanānanda mahāthero mahāgaṇī;
4. Jīvitaṃ viya yo satthusāsanassa mahākavī,  
Sāro suppaṭipattīsu satthasāgara pārāgo;
5. Tassa sisso'si yo vipagāma vaṃseka ketuko  
Ñātāgamo'raññavāsī sīlādi guṇabhūsaṇo;
6. Yo'kā sīhalabhāsāya sīhalaṃ saddalakkhaṇaṃ,  
Tena vedehatherena katāyampiyasīlinā;

Siddhiratthu.